

مئی - جون ۲۰۲۳ء

شیراز

جموں اینڈ کشمیر ایڈیٹیو آف آرٹ، کلچر اینڈ ٹیلینٹ ڈیولپمنٹ سوسائٹی

شیراز

(مئی - جون ۲۰۲۳ء)

نگران: بھرت سنگھ (جے، کے، اے، ایس)

ایڈیٹر: جاوید اقبال

اسٹنٹ ایڈیٹر: گلزار احمد راتھر

معاون: مقبول ساجد

جموں اینڈ کشمیر اکیڈمی آف آرٹ، کلچر اینڈ ٹیلنگو، بجز سرینگر

© ناشر: سیکریٹری جموں اینڈ کشمیر اکیڈمی آف آرٹس کلچر اینڈ لینگویجس

کمپیوٹر کمپوزنگ: عافیہ قاری، جمیل انصاری

مول: 20 روپیہ

شہر ازس منز چھپن و اُلس موادس منز کنبہ تہ
ظاہر کرنہ آموہ رایہ ستی اداڑک متفق آسن چھنہ
ضروری۔

چھپکی بیتر سوزنگ پتہ:

جاویدا قبال

ایڈیٹر ”شیرازہ“

جموں اینڈ کشمیر اکیڈمی آف آرٹس، کلچر اینڈ لینگویجس،

لال منڈی سرینگر

e-mail: sheerazakashmiri@gmail.com

ISSN 2278-3245

ترتیب

5 جاویداقبال گوڈکتھ

مقالات

7 پروفیسر مشعل سلطانپوری ہمال کاشترہاعری ہند محاور

31 پروفیسر فاروق فیاض کاشترہمال ڈرامہ

45 غلام نبی آتش جامہ گلکاری پھلکاری چھلکاری

55 ڈاکٹر غلام نبی حلیم احد زرگر..... عشقہ زولانس اندر

شخصیت

63 شاہد دلنوی شیرعلی مشغول کاشترہاعری ہند پاسہ فنکار

افسانہ تہ البے

76 پروفیسر محمد زمان آزرده بیون گر

79 مکھن لال پنڈتا کپڑے ژور

89 رنکو کول پنچھون

نعت

- فیاض تلگامی 95،
رشید صدیقی 97
غلام حسن غمگین 98،
عبدالرحمن بٹ سکندر 100

نظم

- شاہل بہار
ظریف احمد ظریف 102
نظم
نگہت نسیرین 107
آب حیات
اصل:
110 پروفیسر سنجنا داس گپتا
انگریزی پڑھ ترجمہ:
ڈاکٹر عابد احمد

عزلیہ

- م، ح، ظفر 114،
عبدالعزیز بیتاب 116
اشوک کمار در (گوہر) 118،
اے، کے، ناز 120
نادرا حسن 121،
سید مسعود ہاشم 123

گوڈ کتھ

دنیا وجود پہنچے پڑھ و نیک تام رُو د انسان چمنس سفرس دوران نوہن نوہن
 ترقین ہندی پڑاوسر کران۔ اتھ وتہ دوتکتھ ووت انسان یتھ دورس منزتہ ترقیہ
 ہندی تم منزل کرن طے، یتھ اگر تم پانہ مشاہد آسہ ہانہ کورمت، اُم سُنڈ یقین
 کرن تہ اوس مشکل۔ اُم ترقی شرف پروو پو پو د دنیا اُس لوکتس موکتس موبایل فونس
 منزتہ سوشل میڈیا ہک زال و ہروون جتھ پانٹھ پانٹھ زامہ نمبر اگر کانہہ روزن پچوہ تہ
 سز مثال چھے جو پھے پوہ پڑی متین لیکھی متین لوکن منز اپرٹس آسان چھے۔

کلچرل اکیڈمی بناؤ مختلف سوشل میڈیا ہن پڑھ پنچو کھاتہ، یمن پڑھ
 سائنس پروگرامن ہنر کار کردیہ محفوظ تھاونہ پو ان چھے۔ اوتن تام یو دے صرف
 پروگرامن ہنر تفصیل یمن پڑھ کھالہ پو ان اُس وچ ضرورت اُس زسانہ تمام
 مطبوعات تہ گپہ ہن اتھ پڑھ دستیاب روزنہ تاکہ یم روز ہن پنہ والہ وقتہ
 خاطر محفوظ تہ ۲۰۱۳ء ہک ہیو کانہہ تہ سہلاب ہیکہ ہانہ یمن کتابن ڈتھ تھ۔

اکیڈمی کو راراد ز گوڈ انوار تھا و شیراز تہ سون ادب پنہ ویب سائیٹ
 پڑھ دستیاب تہ برونہ گن کرو پنہ باقی مطبوعات تہ وار وار اتھ پڑھ اپلوڈ۔

اُتھر تحت در او حال حالے جون رہتے کس اُخری ہفتس منز یہ ہدایت نامہ ز
 اکیڈمی طرفہ شایع سپدن و اُلر تمام رسالہ گروہن پننس و قنس پٹھ ویب سائیٹ
 پٹھ دستیاب تھا ونہ تیز۔ کاشر شیرازک یہ شمار یعنی مئی۔ جون ۲۰۲۳ء تہ سون
 ادب ۲۲-۲۰۲۱ء س پرس شایع سپد تھ پرن والدین تام ووت آسن گوڈ نکو شمار بیم
 سانہ ویب سائیٹ پٹھ پی ڈی ایف شکلہ منز دستیاب آسن۔ شیرازک یہ شمار آسہ
 ۱۵ جولائی ۲۰۲۳ء پٹھ ویب سائیٹ پٹھ دستیاب تہ تھتھے پٹھ آسن یینہ و اُلر
 شیراز تہ سون ادب پننس پننس و قنس پٹھ اپلوڈ گروہان روزان تہ متی آسہ یہ
 رسالہ چھاپ کر سچ کام تہ دردست نہ پوان۔

ادبس ستر لوے کھوے تھا ون و اُلر، سکالر، قلدکار ہیکن و ونی یہ رسالہ گر
 بہتھ پنننن موبایل فونن، کمپیوٹرن تہ لیپ ٹاپن پٹھ ڈاؤن لوڈ کر تھ۔ امہ ستر
 واتر یہ رسالہ پنن پرن والدین تام تہ بہتر رسائی اسہ تام ممکن چھنہ ہبکان
 سپد تھ۔ وونی تیسس اچ شایع کر مہ کاپی ضرورت آسہ سہ ہیکہ اسہ ستر رأبطہ
 کر تھ پننہ باپتھ کاپی حاصل کر تھ۔

جاویداقبال
 ایڈیٹر

پروفیسر مشعل سلطانی پوری

ہمکال کا شاعر شاعری ہند محاور

معاصر، ہم عصر یا ہمکال و نس منز چھ اکہ لحاظہ ابہام تہ پاد گروہان۔
 مثالیہ پاتھی نمون اکھ شخص یس گنہ وجہ کنی لو کچے وانسہ منز کھاندر سپد، تھل مل
 پھینہ کنی و چھس خدا تعالیٰ ہن تہ سیو ڈے، پنڈ شری تہ نیہ نس، شرن ہندی
 شری تہ تہ تہندی شری تہ۔ اُمس چھے پنہے زانس منز ژور پور سامان۔ میانس
 لو کپارس منز اوس مجور تہ آزادہ شاعری ہند گل گوش تہ از چھ وونی نے متی میانہ
 ژاٹن ہندی ژاٹھ تہ مشاعرن منز کلام پران تہ پنہ شعر سو مبرنہ تہ شائع کران۔
 روڈے زید، تہندی ژاٹھ تہ ما آسن و چھنی نصیب۔ وونی ہے ہم عصر آسن مُشخص
 کر و تہ کتھ پاتھی؟

تیمہ زمانہ چھے یہ روایت رُو زہو زہمال یا ہمعصر دا یراونہ خاطر چھ
 مجور تہ آزادہ دور پٹھ کتھ پن ثلنہ پوان، نتہ چھ ویدو حسابہ ژاٹھ کتھ کرنہ
 پوان۔ مثالیہ پاتھی ۱۹۵۰ء پٹھ یوگن، وہمہ صدی ہندی ۲۰م ۳۰ روری یا سانہ
 شاعری ہندی ۲۰م ۵۰ روری بیتر۔ مرحوم غلام نبی ناظر صابن وژ ساہتیہ اکادمی

خاطر اہک کتاب ترتیب ”ہم کال شاعر“ تہ کتھ کُرن ڈٹھ (۱۹۶۰ء تا ۱۹۸۰ء)۔
 تھے پاٹھری ڈٹھ ساہتیہ اکادمی ہندے طرفہ ہردے کول بھارتی صابن ”کاشری ہم
 عصر افسانہ“ ناواکھ سو مبرن ترتیب تہ دس ٹلنس مرحوم اختر محی الدین ہوا افسانو
 پٹھ تہ تھ مٹرا ن شمس الدین شمیم، سوہن لال کول، فاروق مسعودی لیس ستر ستر
 ناصر منصور تہ۔

پہ تھو پٹن ہم کال مشخص کرنس مٹریے پٹم پتواہ شیٹھ وری نظر تل تہ
 ریو ایڈٹراونہ ٹاس کیشہ، او کڑ تہ ز میانہ فکر پٹنکو تہ فکر تھو پٹنکو تہ چھہ یے
 وری۔ تہ یمن وریں دوران کیاہ روڈ کاشری زبانہ مٹر شعر و شاعری ہند صورت
 حال، تھہ اڈو مٹری آسنہ کڑ ماہیکہ تہ کیشہ کتھ و تھہ یم غور طلب تہ آسن تہ
 مفید مطلب تہ۔ تفویض ہڈ موضوع حد بندی چھہ ”ہم کال کاشری شاعری ہند
 محاور“ تاہے تہ بس۔

یہ ساعیتہ اسی گنہ تہ موضوع کہ، بیان چہ یا صنفہ ہند محاورہ کتھ کرو،
 اتہ چھہ گوڈیہ ذہنس مٹر تھاون ز محاورہ و تھہ کیاہ چھہ اسہ مراد۔ ابتدائی درجہ کمن
 طالب علمن ہیکو و تھہ ز روزمرہ کیاہ ساگو و سوزبان یوسہ اسی دودہ دس بولان
 چھہ۔ یا ز تم لفظ یم اہل زبان خاص معنیہ ین مٹر ورتاوان چھہ۔ اتھ مٹر چھہ کاٹھہ
 تبدیلی سپتھ ہبکان، غلط تہ اے ز پٹھ کھو تھمت آسہ چلان چھہ روزان۔
 مثالہ پاٹھری ”ز پانڈوہ زنی اسی سے مٹر“ یا ”محمد خدایس کن ہاکہ بتہ چھن
 سوزمت“ یا ”سہ ہساچھہ ہچہ کلہ“ بیتر۔ پوز محاورہ گو و تم لفظ یم پتواہ اصلی معنیہ یو

بجلیہ مختلف معنی میں مزور تاونہ یوان آسن۔ مثلاً پائٹھر ”دہ گز آب وونم“ یا ”تس روڈنہ اچھن منز آپے“ یا ”یاد اچھن ہاڑھنہ نم سکھ“۔ اتھتہ چھنہ تبدیلی سپدان۔ مطلب یہ چھ پننے کنجہ روزان۔ البتہ یہ چھ گنہ مصورس بنوومت آسان۔ مثال چھنہ زے رچھنہ، گز بکہ وونہ لچہ آب تراون بیتہ۔

پینین بیتھ محاورس متعلق اسی کتھ کرو، سہ یوزر تو بذات خود زبانے یاز سورے لفظت۔ روزمر، محاور، کہاؤ ژیا ضرب المثل، ڈوڈر، گنڈ تیبہ، مثالہ شعرس پارا وکر نی سازی سازتہ سامانہ، صنعه، لفظی کنو معنوی، تشبیہ، استعار، مجاز مرسل، مڑژ، علامہ، سورے کینہہ تہ اتھ سارے گنہ چھ تیمہ مقالہ کہ عنوانہ حسابہ ”محاورے“ وونہ آمت۔ یوتے یوت نہ طرز بیان، انداز وادانہ ورتاونہ پنہ وول لچہ تہ تلمہ تراوتا متھ تہ یوزر تو اسی محاورک حصہ تہ اتھ منز شامل۔ اتھ اگر وار پائٹھر سنہ پیہ، اکی وقتہ کین دون مشاق شاعرن ہند کلامہ تہ ہیکہ اتھر بیاد، یاں ز محاور کسے نہس پٹھ بیون بیون وونہ کڈنہ جتھ۔ اسی چھ امہ پزرنشہ آگاہ ز پزتھ زمانس چھ پنڈر تقاضہ آسان، تہ بیو تقاضو حسابہ چھ موضوع بدلان روزان تہ بیم موضوع چھ پن پنہ مناسبتہ اظہار کین نوہن محاورن ہنز منگ کران۔ محمود گامیس پٹھ رسول میرس تام اوس جا گیر دارانہ نظام قائم بلکہ مہجور نس وفتس، یاں ز اوتر اوتر تام۔ فرق اوس یہ ز دوس بر صغیر سے منز نہ، کٹشیر منز تہ اوس بدل ہوانو اچھو رمت۔ آزاد دی ہنز تحریکہ آسہ زور و شور سان چلان۔ صنعتی نظامس منز بیمہ امہ تعلقہ یورپی ملکن منز تبدیلیہ آمہ آسہ تموا اسی

مشرقی ملک سے متاثر کر دی۔ کشمیر منتر سے اوس لگو کر پھر من دیشمت سے شخصی نظام حکومت ختم کرتے تھے اسی جمہوری طرز پر حکومت ڈھنڈے کا طرہ جو جدوجہد کران۔ اتھ دزاوڈ ہمہ صدی ہند گوڈ نیگ نصف اٹھ وائس ستی تڑ، انگریز و کو ر ہندوستان آزاد سے ڈوگر و تڑا و کشپر۔

اتھ منزلس پٹھ اسی کا شہر زبانہ ہنڈر شاعری منتر ٹا کار پٹھو ز موضوع سرس۔ اکھ گو و تصوف سے بنا کھ عشق، یاں ز لولہ شاعری۔ بین دوشوئی موضوعن اوس سانہ شاعری منتر جاے رڈی ہمتس واریاہ وق گو مت۔ پز رچھ یہ ز تصوف سے اوس ٹکہ عشقے، خدایہ تعالیٰ سندس ذاتس سے عشق، ہتھ گوڈ کینڈہا محمود گاگی پینے سے پتہ رسول مہرن ارضی پہلو سے دا خل کو ر، مطلب مجازی رنگہ رنگہ نوو۔ جذبہ اوس سے پز محاورس منتر آہ تبدیلی۔

مہجورن سے آزادن تڑی پنڈہ زمانہ کو تقاضہ سے تھی مطابق کر کہ نوین موضوعن سے خوش آوے، ہم موضوع اسی حُب وطن، کاشربن لگن ہند احساس محرومی، تہنڈر غربت، حسہ حالی، جہنڈ پتہ بجر، آزاد دی ہندری جانر سے رڑر، ر اڑ ہند انہ گٹہ پتہ گاش تیخ بشارت سے نو زمانہ بارس تیخ و و مید۔

صوفیانہ شاعری ہند محاور اوس مختصے، پوز اتھ منتر سے روز و روز و کینڈہ تبدیلیہ یو آئی۔ خصوصاً احد زرگر نے تہ صد میر نے ڈس۔ اتھ پڑاوس پٹھ اوس صوفی شاعری ہند محاورک رنگ نیمہ آہ:

دچھ راٹھ کھو ہلہ ہلہ تھ ما سا و زانہہ دزاو

کارگر کوتاہ دلہ رکھو گلہ کر ٹھہراو



پھٹ پڑھ پنے و بھناویوم پڑھ ستر صاف گو
سنگدل سفید رنگ مے گوم شوم و تراؤن پیوم



حد رؤس چھو کہ آم رائس لیتڑ کترم پان
اد گام زدی نشہ رائس سے مے دلس کان
(صد میر)

چھ کیشہ نئے ہفت ناگن پے چھ کیشہ نئے مثر ذراتن مے
چھ کیشہ نئے کیشہ نہ چی ہتھ کل وچھم کیشہ نئے مے دیدن تل
(احد زرگر)

یہ محاورہ چھ ویو دیو کھ، لفظت اؤند پکہ کئے ورتوومت، تشبیہ اُتی دچھنڑ
کھوورکڑھاٹھ مہ، پوز کیشہ لفظ اسرارکڑی دئی ہیکو۔ ماسٹر زند کون تہ کو رہنہ آہ
تہ پنے تجربہ صوفی سپرن تعبیر کرنچ کوشش۔ بہ دمہ اکھ مثال:

پے ورش پیہ روزہا دؤربر ڈرتھ
مثر وستر پان تامتھ چھنہ صاف
سز کیشہ پوزایہ ہند ماچھم گرتھ
یم نہ باگری مثر مے لوکن لولہ پوش

مالہ کر بکھ تم وچھم پیہتر ہرتھ
شوژ جایا چھمنہ ووتھراوس کتے



رنگہ رنگہ پرتھ گنہ انگہ خوبانے
دوتا سو بھاوس واتہ ہی نہ کانہہ
ہنگہ منگہ نئے آسہ بکھ روشانے
پارے ہو لگے میناہ جانانے

کاشر صوفی شاعری ہند سلسلہ رو دینہ وائلس زمانس منزتہ چلہ وون تہ
امینگ محاور رو دقرب قریب یکسانے۔ خاص تبدیلیا آیس نہ کانہہ۔ بیم مثالہ
تھایو در نظر:

ستھ چھی شہود ستھ چھی شہر
ستن شہرن ڈیڈ داہ بر
تم در بر تزوپران آیوس
وآرانہ کے دروازہ ژالیوس

(محمد کھار ۱۸۹۴ء تا ۱۹۶۷ء)

ضایہ پان گوم ہیر تے بوئے
کرایہ ہولنس انفاسنے
جایہ خود ژورم سیکہ منز سوئے

موت گوس چانے درشنے

(محمد بٹ ۱۸۹۶ء تا ۱۹۷۷ء)

پڑھ شاعری اُس موضوع کیو محاورہ کنی تہوہ مقبول ز مجبورن، آزادن،
 عارفن تہ فاضلن تہ کراتھ رنگس منز شعر و نچ کوشش۔ تھوؤفس ستر ستر اوس اتھ
 مقاس پٹھ دویم مقبول تہ مروجہ رنگ لولہ شاعری ہند، یوسہ پتہ و تھ سانہ
 شاعری ہنز شوب تہ شہیبہ رۄنہو چھے۔ امیگ محاورہ رۄد وار یا ہس حدس تام
 ہوئے۔ مرد رۄد عاشق اُستھ، زنانہ رۄپس منز پُئن وونہ باوان تہ وبادا کھ
 دوان۔ مجبورن کراتھ منز رتھ کھنڈ جدت یاں ز نور اُتچ کوشش۔ تہ تھ پٹھو ز
 کس چھ باوتھ کران تہ کس گن ونان، گیو وڑھنچر تھے روزن جان، تھر وون تس
 دلبر ناوتھ، مدنوؤتھ، دُردانہ ورتھ، نونے اے دزاوتہ یا ون راے وونس، پوز
 محاورہ کنی چھ باسان ز جذبات چھ زنانہ ہندی، نہ ز مرد ہندی:

ژلہ لارۄ جھمکھ حال ونہ ہے وارۄ چھ ہے روے

گلہ زوئے گیم اوش ووتھم ددرلیہ ونے کیناہ

تسبز لولہ شاعری ہند محاورہ جھنہ گسہ آمت یا پڑانیومت محاورہ، محض
 لفظیاتے اے نمو، روگہ روگہ، ویور، سپہ ریش، ہانول، پوشہ تھر، چھندر پھو،
 باغہ پیر، ون ہار، ٹیکہ پٹری، لچھ دُر، مس چھور، کارہتری، درشن دُر، ماٹنم، اجہ راژ
 بیتر تسند دیت چھ ٹاکار۔

آزادس ہیو انقلابی شاعر تہ رۄد نہ لولہ شاعری ہنز جادو ہانکلہ نغہ

مجھ - سہ آو گوڈ گوڈ لولہ شاعری ہندے فاضلہ مارکس منز - تہندس اظہارس منز
مجھ خلوص تہ محاورس منز نہ کا نہہ تکلف:

یہ بدنک جوش اندریم زر
چھم چھم دلدار چوئے شر
لگن ہنز پامہ چون خاموش
وولو مو روش یہ مارے پان

لولہ شاعری رُوز تہ پٹھہ از تام برابر و ہ بدلان تہ مختلف رنگن ہند گتہ
گیو رکراں کا شہر شاعری منز جاے شیر تھ - البتہ امہ کس محاورس منز رُوڈ وِز وِز
تبدلیہ یوان - غلام نبی عارض اگر مروجہ رنگ سے مٹے رُوڈ، پوز سہ رنگ بنیو و
تس نیش و ایتھ ہناشوخ پہن:

تھو گوش کتھن وارے چھم یار تمنا
یا چہر رتھ نالہ متہ نتہ کوہہ موئیس بو

امہ وِز اوس بنیہ دو یو شاعر و کا شہر شاعری ہندس دربارس منز پنن ناو عیشہ
نوومت - تم چھ مرزا غلام حسن بیگ عارف تہ فاضل کشمیری - اہندس کلا مس
منز اوس حاوی لولہ شاعری ہندے محاور، پوز بہتر شناخت بہتہ - مثالہ چھے:

چائی صورت وچھ دو یو چشمو دین وِژ جاے تھ
وچھتہ وئی زائہہ کائسہ کن ماتئو مے ناری دلبرو



سوز چگرس چشمنِ نخریے
 زلزلہ پنجرس لاجنسِ گل
 موکھ اسپہِ وُن روخِ شبِ نخریے
 ونسریے تکر نیونمِ دل

(مرزا عارف)

ونسریے تس پتہ قاصدِ سوزم
 پے نے بوزم شہر تہ گام
 چگرس زبتہ پیومِ زلہ وُن زلہ وُن
 دپہ نا درشن اندِ مینون نیاے



ما تکتھ یوگنِ قدمِ زانہہ ما تجتھ یوگنِ نظر
 ہایہ گو و شیرن تہ پازن ضایہ گو و سامانہ مینون

(فاضل کشمیری)

لولہ شاعری ہندس محاورس منز، مردہ سید طرفہ لول باؤن، سبتہ زنانہ ہتھ تہ
 خطابی لفظ ونسریے، بالکریے، ونسی، بالی ورتاؤن گئے اکھ کتھ، زنانہ ہند
 پاراؤ کر ساری ستر سامانہ، پلو پوشاک، گہنہ پاتھ، اولت و اولت تہ چھ اتھ
 محاورس منز جاے رتھ لبتہ پوان تہ جذبات گہہ استھے۔

یہ زن مے گوڈے اشارہ کو ربد لو نس زمانس ستر ستر تہ نو نو نو تقاضو کنر

آئے مہجور صابنہ وقت پٹھے اکھٹے تہند ڈسری کا شہر شاعری منز کیشہہ ٹوڑی موضوع تہ۔
 مثالہ پاٹھی قومیت تہ وطنیت، خود مختاری ہندس و قنس منز پٹن بجر، پٹڑ خوشحالی، پٹڑ
 سرداری تہ ازسورے کیشہہ لڑھ گوٹ۔ غربت، ناداری، غلامی تہ بے بسی منز
 ہنہ تیخ صورت حال۔ یہ تہ پٹھ لوگ پننس و طنس لول برنہ کس جذبس پوچھر،
 پٹیکو نظار، پیٹیک حسن تہ ماری مؤند او ند پوکھ ہیوٹن سانہ شاعری ہندس محاورس
 منزین تہ ستی یہ احساس تہ گٹن ز موجود حالات گرہن تبدیل سپدنی:

ویرناگ، ڈور، اچھ دل
 بولان چھ طوطہ تے جل
 سے سوز بوز جل جل
 گلشن وطن چھ سوئے



تھرس پٹھ ہبان چوئے کلام
 بلس پٹھ گلالہ زن تابان
 پادن تل تے چھے ہندوستان
 پاد کر پنہ نے باغ زان

بقول محمد یوسف ٹینگ:

”مہجورنی کا شہر شاعری چھے سانہ قومی تحریکہ لر لورہ تھان تہ پکان۔ یات یات
 کثیر منز قومی تحریکہ ہنر ریہہ شولان گے، مہجورنس کلامس منز تہ ہیوٹن شبنم

ژھو کن تہ اکہ بدل قسمنگ آکو پڑتھن،

امی قسمنگ احسان بنو عبد الاحد آزاد اکھ انقلابی شاعر۔ یو دوے اُمی سُنڈ
یہ نعرہ انقلاب ناسرے اوس، یہ پتہ ترقی پسند تحریکہ ہند انجامہ کنی ثابت تہ
سپن، یو زسانہ زبانہ مٹریس محاورہ پڑھ شاعری ہند خاصہ وجوہ دس مٹراؤ، تمہ کور
امینگ دامن واریاہ کشاہ تہ اتھ ہر روون بوش۔ آزاد نہ نظمہ شکوہ ابلیس، دریاو،
شکوہ کشمیر، نالہ بڈ شاہ تہ پتہ تسنر انقلابی نظمہ چھے کاشر شاعری ہند اس اتھ دورس
مٹرتھنہ پبنہ واجنہ تڑھ نظمہ، بیم سبٹھاہ کال تام یاد تھاونہ بن۔ بیو نظمو مٹرا اگر بہ
مثالہ دینچ کوشش کر، مقالہ کڈ واریاہ کاڈ۔ البتہ کینہہ شعر ہبکہ پیش کر تھہ تیمہ
کنی یہ نہ زغرلہ تہ کتھ پاٹھی اُس اوتراے رٹھو:

نارِ وُزمل تزاو رو الراوِ جنگل کوہ تہ بال
ژشجر سوژچہ ڈشجر روزان خانہ مول گلزار چھا



تالہ پٹھ پاد بیلیہ کھارک لہ داسو
شیر ہندک لچھ پوش پوننہ آے
وار وار پٹھ ہنگن جاے گر نیاسو
پانہ وائی کاسو پنہ نی نیاے



دران چھائلہ کتر مندور ہارس شراونس اندر

خرابی اُس بیتھ لَازِم سہ عالم گلو و خراب اُخر

(عبدالاحد آزاد)

تھہ وے شعرو تہ تھسی محاورن شیر پینہ واجنہ ترقی پسند تحریکہ خاطر و تہ
تہ شخصی حکو مو ہندس ڈیونگ ونس متو متی آے ترقی پسند ادیبن تہ شاعرن
ہندس ناویز ونہ گن، بیہنزا آواز متو آواز رلاون والبن ہند اکہ اکہ، اکھ کارواناہ
سمان گلو۔ غزل صنف اُس ترقی پسند اردو ادبس منز تہ جا گیر دارن ہنژ ژونو
ز اُتھ اوک طرف ترا دنہ آچو تہ پیٹہ تہ روز کینون و رین عمالیسے تل۔ تہ گرتھ
تہ یو دوے ناو خاطرے کائسہ غزل لچھ، تمیک محاور اوس بلکل مختلف، تیج
پارے آزاد نہ وزے ہیمو اُس۔ مثالہ پاٹھی:

رگن رگن سز نیہہ رمن رمن نیہہ رنج نظر بہتھ حسین بیمرزل
مے مون شود بود چکور بو مبر کر ہے تہ کوتاہ نکار کر ہے

(ناوم)

اُند پکو موسم گملیو و میٹھو و
مینے اوش ہند ریا کہو پے روشا

(راہی)

مشکلن منز ناو لچھو ورز واوک شور و شر
شور محشر کاروانس بائراوان بلبلو

(عارض)

ترقی پسندی ہند نظریہ کنز اوس صرف مواد نظر مل تھاؤن، موضوعس گن کل کر ڈی تہ
پیش کتھ پاٹھی کرو، تھ نہ تہواہ ہمت ڈی تہ موضوع اسی طبقاتی نظامس پٹ
کڈی، جاگیر داری تہ سرمایہ داری خلاف لکھن۔ لہ موچہ گامتن ہمت ڈی،
محنت کشن، مؤزورن تہ کم لین ہندی گون گونی، سید سیو داندا زیانس پٹھ آوزور
دہ۔ اتھ منزہ اُس کا نہ تہ داری تہ نہ سنبہ۔ نظمہ لوگ چلے جاو، یو دے امہ
بڑوٹھ تہ نظم لکھنہ یوان اُس، پوزہیت اُسکھ مروجہ اضافن ہنڑے۔ غزلہ
ہیت، وژن ہیت، گاہے مثنوی تہ، مسدس، ترجیح بند تہ ترکیب بند تہ۔ نظمہ
ہندس سلسلس منز آیہ ہیو حسابہ اکھ پھیر ہاوتبدیلی۔ آزاد نظمہ گپہ کاشر شاعری
منز معارف تہ پتہ سانٹ تہ۔ ترقی پسند شاعری ہند محاور اوس بلکل مختلف تہ
مروجہ شاعری نشہ بدؤن۔ اتھ سلسلس منز چھے دینا ناتھ نام نہ ”جنگ باز،
خبردار، نئے چھم آش پچ، واون وونم، زون کھوٹوٹ ہش“، رحمان راہی نہ
”رؤزکتہ جاگیر داری، بیلہ روکھسہ صحیح پڑو تر اوان، ویشا کھرتہ رؤف گر،
اڑچ کتھ، پتہ اگر پیہ ہاموتس تہ واری“ بیتر وئس تل تھاو نہ لایق۔ کیشہ مثالہ
دن یڑھ شاعری ہند محاور بڑوٹھ گن انس منز مد:

زرں بوش زردار نے راج روزیا
ژھرن لور کٹہن سرس تاج روزیا
اُکس ژور تہ ہر بینا کھ محتاج روزیا
یہ مغرور سرمایہ دارن پڑژھن چھم

پٹھے بانہ کبن نو بہارن پز ژھن چھم



وُشن ووژل بہار وُچھ، کُشیر ہند امار وُچھ
 ژ کالہ کبن کنڈہن پھستھ پگاہ چھ مینون یار وُچھ
 پراڈ وُستوار وُچھ، تلو تیونگل تہ نار وُچھ
 (نادم)

بہ محنت کش، چھ پاداوار مینونے
 زمین آسمان مینون سمسار مینونے
 چھ روشن جوشہ وُن نہ نار مینونے
 بناون نوو نظاما نوو زمانا

(نور محمد روشن)

خونہ سانے چونہ دامانس جران جاگیر دار
 زونہ گاشس سون گمہ کھاسبن بران جاگیر اور
 (راہی)

ترقی پسند تحریکہ ہندس اثرس تل یہ کیٹھو ہا لکھنہ آو، تھ اوس نہ فی اعتبارہ
 تیو تہ مول کیٹھہ۔ اکھ جٹہ جو شا اوس، تھ گوتام وری دزائے۔ وونی اوس
 دزس ملکس منزا دبی لحاظہ بدل ہوا تو۔ ترقی پسند تحریکہ اوس دلہ آمت تہ نو پتھ
 رو اس بڑو ٹھ گن آمو۔ اڈ یاشب خون تہ پینن اردو ادبی رسالن تہ میگزین ہند

اثریابیوں و جوا تو کئی۔ تمہنے شاعرانہ ادب میں بیوترتی پسندی ہنر علم کچھ اُس، پیو و
 نو سر سوچن تہ اتھ پنچس پٹھ واٹن ز شاعری منتر چھ فن سبٹھاہ اہم۔ شعر ہیو یا
 صنفہ یو دوسے تے روز، پوز موضوع اُس مختلف۔ یہ آواز انہ ز موضوع اُس تن
 کیاہ تہ، اظہار گوہ سپدن تہ گئی ز مول کھسبس تہ پوشہ و ن باسہ۔ ماد صابنہ
 نظمہ ”نابد تہ ٹبٹھ ون، زلری ز اُج، کاٹھی درواز پٹھ گر تام، ژور و ورق ژور
 افسانہ“، ر ا ہی صابنہ ”دہہ و ہری، تزنے کور، دریا سلسبیل، اکھ تشبہہ، رُو د، تخلیق،
 پے چھ ظلماتہ زوان“، کاہل صابنہ ”جنگل، پرستی شاہراہ، ز پروبزج“، فراق
 صابنہ ”نامحرم چٹس نہ، پچا لُر، بیکرزل، اولُن“، مظفر عازم نہ ”حُسن تہ زندگی،
 اڈ ژئی باسن، اولُن تہ منہ کامن“، بیتہر چھنے امہ لحاظہ ہم کال کا شاعر شاعری ہنر
 شوب تہ شبہہ۔ اؤہند محاورہ چھ ترقی پسند دور چہ شاعری نشہ کتہ کور و کھر۔ نظمو
 منتر چھنے مثالہ دنہ مشکلی آسان، تکیا ز نظمہ ہند تسلسل چھنے امیک اجازت
 دوان۔ تاہم پڑھن نظم من ہند محاورک ہنا انداز کر نہ خاطر دمہ بہ کیشہہ مثالہ:

بر ٹنگہ دزائتر زپنے ژائتر
 بڈ جوراہ ہینشن نہ آئتر
 تھکو متڑ ژھینو متڑ وسہ ریتر
 زیند پائے بیمہ دُنیا گا متڑ
 ہے دم گوو وولہ دارا مورو
 واو زنگا دپہ پیہ گنہ کانوہا

دو یم زُج پتھر پین یون گن
دیوان خانس دو گوہ شہہ پھیر
(زُری زُج: نادم)

خوشحالہ ہرناگنس ونس منر
وہان تاپس گندان ژھاین
نظر پھرس تہ ناگہ وانی پڑھنس
ژکس تہ حاران اچھو وچھان کیناہ
(قعدریا: راہتی)

زر تہ خاموش راتھ
ٹھس ٹھس ٹھس
کتھ نہ باتھ

(بے دکھ: کائل)

پھڑ متڑ چھ گتو اولی بامن
تس مسولہ موسم پڑا ژن پٹھ
اڈ ژڑی بامن

(اڈ ژڑی بامن: حازم)

پکی پکی لوس نیڑ وڈرو پٹھ
شاید مرگر وائے بز وٹھے

اُچھ مُورا وَاکھنا

(گر: حامدی کشمیری)

یِتھ وِروارس منز کوٲت ژا کیکھ

پینہ سر پھس اتھ وچھ نکھنا وَاکھ

وولہ وولہ میئے نیش

ژے چھکھ سو حوا

بے چھس آدم

(تخلیق: غلام نبی خیال)

ببین نظمن ہندے پٹھ کنہ ذکر کور، بیم چھے تمہ زہ حانچ نمایندگی کران،
یِتھ ”جدیدیت“ ناودینہ آمت اوس تہ یوسہ نتیجہ اوس تین حالاتن ہند بیم امہ
زمانہ معاشی، سماجی، سیاسی، سائنسی، تکنیکی وچھ ہاتو کئی یورپسے نہ، دُرس
دُنیا ہس منز پاد گامتر آس۔ ”کاشتر ادبک تو اُرتخ“ چھ اتھ سلسلس منز بیم سطر
اسہ بز وٹھ گن انان۔

”شاعری ہنز تو پئے آہ ۱۹۷۰ء پتہ بارسس۔ بیوٹیون سہ سحران پنے پنے انفرادی
زندگی منز، نیمہ بحر انگ صرف پر تو ۱۹۷۰ء بز وٹھ موہا عروٹیون مت اوس۔ قدرن
ہند مسمارتہ رشتن ہند پھلہ پھراٹ بنیو و بہنز زندگی ہنز توہا اکھ حقیقت، نیمہ کہ
بدن چہ سارے بز اُتو تہ باقی روز نہ تہ نہ ٹیون بیوہا عروامہ کہ بدلنگ
ضرورت۔ آسنگ ژھر بر تہ باسنگو بزم گری بیوہا عر (دل ملول ماٹھی) ہمیشہ

خاطر قبول۔ پتھر مہ پتھر ہندی شاعر ہی کو نہ دو کہ ہاونہ علاؤ بز وٹھ پکتھ۔ صرف اکھ
رحمان راہی اُس نو پتھر ہند بن شاعر ن ستر ستر یوت رو دنہ بلکہ تم بن وٹھ تہ“
(ص: ۲۱۷، گوڈینگ چھاپ)

امہ پتھر ہنز شاعری ہندس محاورس متعلق چھتہ یہ تو ارنخ لکھن والسن ہنز
راے یہ ز ”شاعرانہ تہ غار شاعرانہ زبانی ہنز اپز فرق گتہ یکسر ختم“۔ مطلب
چھکھ ز شاعری ہند کا تہہ خاص لفظت رو دے نہ۔ امہ پتھر ہند بن شاعر ن منز
چھ تم نمائند حیثیت دوان گلشن مجید، شفیع شوق تہ رفیق رازس۔ یہ تو ارنخ سپد
گوڈنچہ لہ ۱۹۷۸ء منز چھاپ۔ تنہ تہ گے وونی خار سان وری ۴۰ رم۔ یمن
۴۰ رہن و رین ہنز شاعری ہندس محاورس اے سام ہمو، تہتھے بلکہ امہ کھوتہ
زیوٹھ مقالہ گڑھ تیار۔ تاہم کہہ کتھ ژھوٹراونچ کوشش۔

وہمہ صدی ہندس اتھ موٹس پٹھ یاں ز نو پتھر ہنز کتھ کران، یمن
شاعر ن ہند ذکر کر نہ اُمت چھ، تہند کلامک نمونہ چھ یہ:

سر یہ گڑھ تام ڈبکس پٹھ تہ پدن تل اُسم
موسمک کینہہ مہ پڑ ژھوی وُج مے کل ہو ہو ہو

(رفیق راز)

پڑتھ راتھ (سر س) نہنا وان قد

دیہ پڑاپہ کوء کر پھاہ تاپہ ٹیکس

کھسہ فیتہ پھیکس (ساز ییم جوان)

دشمنِ سندی.....

(گلشن مجید)

ہمہ بٹھ روزم ژتہ کن دا ترھ تیمہ بٹھ روزے شہنامہ پران
بوزکھ نے کیشہہ جھنہ کاٹھے راہ سہلاب کدل گو مت نہوتھ
(شفیع شوق)

ژڈی تو کاکد، اتھ چھم سردن
سن چھکھ دژمژ فردن فردن
(ایس راضی)

عجیب حادِثا سپن ظفر کتھن کتھن اندر
نفر پنن جد اسپن وو پر نفر چھ ہم خیال
(م، ج، ظفر)

میانہ دلچ پڑتھ کانہہ دبرے
بریزی وانچ لایا ہش
(جی ایم آجر)

بیونمو، نوکنی ہیکو تھو یہند محاور کہہ وکھر آسنگ انداز گرتھ۔ ڈاکٹر حامدی
کشمیری چھ امہ بزوتھ اکھ زوری سون ادب (۱۹۷۶ء) کتابہ منز شالیج
سپدی مٹس ”کاشتر نظم“ مضمونس منز، اتھ دھولس منز کاشتر بن نظم نگارن منز چمن
لال چمن، غلام رسول سنتوش، رشید نازکی، مکھن لال بیکس، فاروق نازکی، مکھن

لال کنول، محی الدین گوہر، رادھے ناتھ مسرت، موتی لال ناز، مرغوب بانہالی، سید رسول پونپڑ، فرحت گیلانی تہ بہ مشعل سلطانی پوری بیترتہ گنڈراوان ونان ز دیمین شاعران ہنوز نظمیں پڑھ اگھ سرسری نظر تر اوہ مڑ چھ ننان زیم چھ کلہم پٹھ تہنہ ز جمان تہ تر این گوڈبران یم کاشر شاعری منز ۱۹۴۷ء پتہ نندہ ذراہ۔ بہ چھ واقعہ زیمین شاعران چھ نوہن حالات ہند سون شعور تہ یم چھ زندگی تہ پندہ عہد ک مختلف مسلہ تہ کھری فنکارانہ شعور سان ووتلاوان۔

اتھ کتھ کن کورے شاید ا کس جلیہ اشار ز زمانہ چھ بدلان روزان تہ امہ کس بدنس مڑ چھ حالات تہ بدون سپدان۔ پڑتھ قسملک حالات، سیاسی، سماجی، اقتصاد دی، علمی کیوفنی، تہ یم حالات چھ ٹوری مسلہ، ٹوری موضوع تہ نو منگہ پاد کران۔ پھند عکس ادب، نثر کس کیو نظمیں منز پیش کرنہ بدوان چھ۔ لہذا ہیکہ نہ ادبک محاورہ تہ ہوے ا ستھ۔ موضوع تہ مواد چھ پانے پنن محاورہ شخص کران۔ ترقی پسند ادبک محاورہ اوس اگھ، تمہ پتہ جدیدیتگ یا جدید حسابا گہی ہند وکھر تہ مابعد جدیدیتگ بدل۔ وونی یم شاعر یا ادیب ۱۹۸۰ء پتہ نندہ ذراے، تم کرنے پنہ زمانہ کن حالات ہنوز ترجمانی، میون ذاتی خیال چھ زیس بہر حال بحث طلب ہیکہ ا ستھ ز کاشر ادب او پڑتھ وز لبین بھین لاگنہ۔ کشر ہندک حالات اسی نہ ترقی پسند ادبی تحریکہ ہنوز منگ کران، نہ ہندوستانی، پیتہ کرن گیا و سرمایہ دارانہ نظام قائم۔ خوجہ کہ تمام اسی، پھند انمہ چتھ توتہ کیشہہ غریب پلان اسی۔ تھ پٹھ اسی نہ قدر تہ تہ ہنوز مسمار سپر مہ۔ انفرادی زندگی ہند بحران تہ اوس نہ،

رشتن ہند بھٹہ پھڑاٹ تہ نہ۔ یورپی لکن ہنز سوتہا بی تہ بے بسی تہ اُس نہ،
 و نہ تہ چھ آبادی ہند اکھ یو ڈھبہ مُشتر کہہ خاندانی نظامہ کئی زندگی گزاران،
 خصوص گامن منز۔ اسہ ہے جدید تہ تراے رُٹ تہ کمہ وجہ۔ اسہ گپہ بیلیہ و
 نیلیہ ووڑم تُلنہ ہال۔ یہ کور تہ کور پیتر کسہ۔ یمن دولابن ہند اُس و بد اکھ
 دوان روڈو، تم چھ ووڈو ہوان پیش تہ، بز و نہہ کنہ ماہکین تہ۔ یورپس منزیم
 ادبی کیونئی تحریک چلیہ تم روز ہتہ ہتہ و ہر یورواتان تہ سیمہ و یورواتان چھ،
 تہ چھ کرتام پڑانیمہ آسان۔ اسہ دیت نہ پیتہ کین اصلی مسلمان کن پرنہ پاٹھی
 توجہ۔ ڈپو از چھ ووڈو اُس سَنُو ہوان زسانی مسلہ چھ بیون بیون تہ بد و ن۔
 ہتہ مین ۳۰ رهن ۵۰ رهن و رین کلہم پاٹھی یہ ونہ آوزیم موضوع ورتا ونہ آے،
 تہند لہجہ تہ چھ، ورتا و تہ چھ تہ محاورہ تہ چھ صاف صاف پاٹھی تہ نہ وائہ پُئن
 باس دوان۔ افسانس مثر اختر محی الدین اُخری دوہن ہند افسانہ یا اُز کین
 لکھارن ہند افسانہ تہ شاعری منز اُز چ شاعری۔ کینہہ نمونہ چھ یم:

نُونِہ جَوین دِتکھ بدل بد رو

خام مازس و تِکھ کباب کِکھ

(علی محمد شہباز)

کر بلا ہس منز کران اُس پنے صُجک ابتداء

شب گزاران مجلس شام غریبانس اندر

(مشاق کشمیری)

گلو تہ گڑ ہے بنگہ، اقباب تار کھنبرہ ہتھ

دُور و ن ہندو و ن سرو شمشاد قد جانانہ دود

(رسول پونہ)

ژیر گجہ تیہرس دُز اُلس گلو لہ اول

توئیہ منز اوئمت درمن مثل یاد پیوم

(پریم ناتھ شاد)

ہوا چھ تیز پکان، رُما تہ ما چھ دران

شمع چھ گزالیہ کھوان، دریا دریا نہ دریا

(منشور بانہالی)

ہور ک پھل پھلو یور تہ یور ک ہور نو ان

جانا وارن چھنہ سرحد سرحد آسان

(شہناز رشید)

بیم شعر چھ غزلن ہندو تہ نظمن منز، راؤن (ناجی منور)، وُئہ تہ ہر گاہ

(واسد یو رہیہ)، چھوت کز وئہن (فاروق نازکی)، تشپہہ (گلشن مجید)،

شاعری (شفیع شوق)، تیلہ اوس سبزر (نسیم شفا ئی)، اکھ احساس (مجروح

رشید)، وون (فیاض دلبر)، تھا لگ گو د (بشیر اطہر)، شا پھ (علی الیاس)،

مشقہ ہند خالی اند (مندیب الرحمان) تہ پڑھے نظمہ۔



کتابیات:

- ۱: کاشر ادبک تو ارنج: شفیع شوق ناجی منور، گوڈینگ چھاپ
- ۲: صوفی شاعری: حصہ، موتی لال ساتی
- ۳: کلیات احد زرگر
- ۴: سمرن: ماسٹر ز ند کول
- ۵: کلیات مہجور: محمد یوسف ٹینگ
- ۶: کلیات آزاد: پریم ناتھ گنجو، کلچرل اکیڈمی
- ۷: کاشری ہم عصر افسانہ: ہردے کول بھارتی، ساہتیہ اکادمی
- ۸: ہم کال شاعر: ناظر کولگامی
- ۹: سون ادب: ۱۹۷۶ء، کلچرل اکیڈمی
- ۱۰: ازیچ کاشر شاعری: کشمیری ڈیپارٹمنٹ، کشمیر یونیورسٹی
- ۱۱: سون ادب: ۱۹۷۲ء، کلچرل اکیڈمی
- ۱۲: عصری کاشر شاعری: ڈاکٹر مجروح رشید
- ۱۳: کلیات عارض: غلام نبی گوہر
- ۱۴: زبان تہ ادب: شفیع شوق
- ۱۵: کاشر شاعری (انتخاب): کشمیری ڈیپارٹمنٹ، کشمیر یونیورسٹی
- ۱۶: جدید کاشر شاعری: حامدی کشمیری

- ۱۷: کلیاتِ مرزا عارف
۱۸: شیرازِ فاضل کشمیری نمبر، کلچرل اکیڈمی
۱۹: نوروِ صبا: رحمان راہی
۲۰: منہ کا من: مظفر عازم
۲۱: سیاہ روڈِ جڑ بن مٹو: رحمان راہی



پروفیسر فاروق فیاض

کاشمر ہمکال ڈرامہ

روایت تہ تو اُرنجی دستاویزات دوشوے چھہ شبقہ شہادت آپہ تن تھوان زِ
کَشپَر چھہ سبٹھاہ پرانہ وقتہ پٹھہ علمی، ادبی تہ تہذیبی سرگرمین ہنز اکھ بڈ مرکز
اُسْمو۔ امہ حوالہ چھہ پیتہ واریاہ تخلیقی فنی شعین علاؤ فن ڈرامہ نگاری تہ انچ شرحی
عمل تہ سبٹھاہ وسوار بنیادس پٹھہ بروٹہہ پچھہ۔

ڈرامہ چھہ بنیادی اکھ performing art تہ کَشپَر ہند ثقافتی زندگی منز
اُس تم واریاہ انہار بدس نیمہ کنز اتھ مخصوص فنس سرپرستی آپہ تن رُو ز۔ یہ اوس
فرحت حاصل کرنہ خاطر ذُا ژ بر مینی۔ ہندو معاشرس منز اوس ritual نبھاونگ
اکھ طاقت و ر ذریعہ تہ بودھ مذہبس منز اوس امیگ عقیدتی طرح سبٹھاہ معنیہ
سوو۔ مگر کارکونا حکمرانی پتہ یوس ولہرش کَشپَر منز در پٹھہ کی آپہ، بیتھ منز مرکزی
حکومت لاکم ڈینج گڑھتھ حکومت لوکٹمن لوکٹمن خود مختار کوٹہ رازن، بڈن بڈن
زمین دارن یعنی طاقتور ڈامرن تہ خود غرض افسر شہا ہی یعنی کالستن ہندس اتھس
منز آپہ تہ ذُا ژ تہ شوژر کس بنیادس پٹھہ یوسہ اجارہ داری برہمن طبقن ہندو
سماجس منز حاصل اُس بیوسا رُوے چیز و ستو گپہ کَشپَر ہندس معاشرتی، سیاسی

تہ مذہبی صورتِ حالس تہ منظر نامس منز سبٹھاہ شدید نوعیت کمن سیاسی ڈوین، معاشرتی ناکارگین تہ شٹھ ذات پرستی ہند بن سرگرمین حوصلہ افزائی۔ امہ کس پوت منظرس منز ییلہ مندرس تہ مٹھن پر تپت را، تخلیقی ڈرامہس را ورازن ہنز سرپرستی۔ کشپر منز دیٹ نمو ساروے تبدیلیو کاشرس روایتی لگہ تھیٹرس واریاہ تحریک تہ بانڈ و ہنتر عام لوکن ہنز بے چینی تہ بے بسی تہ استحصالی قوتس ہندس ظلمس تہ جبرس تہ مذہبی قیادت کس کھو کرس پٹھ طنز تہ ٹپ ٹو کرڈی۔ یہ ہے چھ وجہ زٹو داہمہ صدی منز چھ گوڈنچہ لہ دون پایہ بجن سماجی کینو ثقافتی تہ تواریخی شخصیتن ہندس کلامس منز ورگہ پاٹھ کر امہ لگہ تھیٹر کہ حوالہ زیرین اشارہ تہ میلان مگر یہ سورے اوس زبانی زبانی روایو پٹھ ڈر تھ تہ یہ اوس نہ کنہ جاپہ قلمبند۔

ڈرامہ بحیثیت ادبی صنف چھے کاشرس ادبی تواریخس منز وہمہ صدی منزے کاڈ کڈان۔ ییلہ ڈرامہ گندس ستر ستر گوڈنچہ لہ تحریری صورتس منز محفوظ کرنہ آہ۔ یوتے یوت نہ بلکہ آہ کیشہ روایتی لگہ پاٹھ تہ تحریری صورتس منز قلمبند کرنہ۔

ڈرامہ ہک فن چھ اکھ پیچید عمل۔ یہ چھ مختلف فنن ہند مرکب، مربوط تہ منظم یکت۔ وچھن والبن یا پرن والبن چھ کہانی یا دلپلہ ہندس روپس منز نفسیاتی سکون تہ مسرت تہ بدس یوان، ڈرامائی عملہ منز کردارن ہنز ہیجان خیزی ستر چھ تماشاہ بینن یا پرن والبن تہ زندگی ہنز کڈ رہن تہ کرتھٹھن تجربن ہنز

دگ سر ڈی پوان۔ یہ چھ بزنس مینز ڈرامائی تکنیک یا کرافٹ کہ استعمال کہ ذریعہ وچھن و اُلِس یا پرن و اُلِس بزنس مینز زمان و مکائیک سرحد ڈیٹھ تمس کاہل پٹھ اکاہل ڈنی ہیک تہ تخیلی سفر کرناوان۔

وقت چھ اکھ اڑھیون تہ مسلسل عمل۔ یہ خان مینز باگراون اگرچہ غار قدرتی process چھ مگر امہ حقیقوک ادراک تہ فہم حاصل کرنہ خاطر چھ تو ارنج دانو مختلف محرکات تہ تبدیلیاں ہندس انقلابی آپہ ظہور پذیر سپنس پٹھ وقت مختلف زمرن مینز باگراونچ کوشش کرہو۔ باگراونچ یہ عمل چھنہ آفاقی یا universal بلکہ چھ یہ علاقائی، خطی تہ قومی سوتھرس پٹھ اہم تبدیلیاں تہ انسانی کامیابین ہندس دس پٹھ مقرر کرنہ ہوان۔ تو ارنجی کالہ باگے ہندس اتھ کاٹھ گرس مینز چھ تہذیبی یا فنی سوتھرس پٹھ مختلف ادبی صنفن ہندس مختلف کالہ پڑاون ہند تعین ہوان متعین کرنہ۔ یہ عمل چھنہ حتمی تہ اتھ مینز چھ بوز شوڈیچ گنجائش تہ گتھ۔

زبانی روایو پٹھ ڈتھ ڈراما ہس نسبت یس بیانیہ زیر بحث رودمت چھ تمیزک بحث اوک طرف تر اوتھ چھ پرنہ پاٹھ سچ کہوٹ (امبردار) تہ گریسو سندر (محی الدین حاجی) کاٹھ ڈراما نگاری ہنڈ زجدید مثالہ۔ کاٹھ ڈراما آو گندنس ستر ستر گوڈنچ لہ تہ قلمبند تہ کرنہ۔ بین دو شوڈی ڈراما ہن ہند موضوع چھ وکھر وکھر۔ سچ کہوٹ یو دوی زن روایتی تہ ریون پٹھ مبنی مصنوعی معاشرتی صداقتن ہند کھو کھز یار درشاوتھ عملی رٹھرچہ بالادستی ہند ڈرامائی دلہل

پیش کران چھ بیلیہ زن چھ مئی الدین حاجی سُنڈ گز پُسی سُنڈ گز زری تہ جا گہر دارانہ سماج و سعادری، خوچہ داری تہ گملمین ہنز بے بسی تہ مظلومیت ڈراما ہک مرکزی موضوع بناوان چھ۔ یہ چھ Established، سیاسی نظامس تہ امہ کین حاشیہ بردارن پٹھ اکھ زبردست critique اکھ چوٹ۔ بیم دوشوے ڈراما چھ وسیع دائرے منر سماجی ڈراما ہن ہنڈس زمرس منر پوان۔

معاشرتی اصلاح کاری ہنڈس جذبس تحت ہکوکھ ڈراما ہن ہنڈس اتھ فہرستس منر تم ڈراما تہ انتھ بیم کاشرن ہن ہنڈس شٹھ معاشرتی ڈھانچس منر اکھ نو تبدیلی ہند آے کانچھان اسی۔ معاشرتی ناکارگی یں ہنڈ اصلاح، روشن خیالی ہنڈ متعارف کرن تہ نو معاشرتی نظاچ بنیاد تراونی اسی یمن ڈراما ہن ہنڈ بنیادی مقصد۔ یمن ڈراما ہن منر چھ ٹی۔ این۔ ویشنوی سُنڈ لیوکھمت چتر تہ سماج کی بھول، یاسمن کشمیری سُنڈ ودھوا، دینا نا تھ مدریار سُنڈ شرارت۔ یمن ڈراما ہن ہنڈ مقصد اوس جدید تعلیمہ ہنڈس پوت منظرس منر ریزن تہ توہامتن پٹھ مئی کاشرس سماجی ر و یس منر روشن خیالی ہنڈ جذبہ متعارف کرن۔

۱۹۴۷ تہ بیلیہ شخصی راج کہ خاتمہ پتہ کشپ منر ا کس مخصوص سیاسی نظر بیہس سرکار تہ سٹیٹ کس و پوس پٹھ پرژا کرینچ کوشش آہ کرہ۔ سانس ڈراما نگارس ر او تخلیقی پاری زان تہ بیڈوسرکاری ڈھونڈورچی، وقتی مسالین تہ ایمر جنسی نوعیت کین موضوعن آہ ڈراما ہن منر مرکزی اہمیت دینہ مگر یمن ڈراما ہن ہنڈ شور و روئے زیادہ کالس قائم، سرکاری سرپرستی ختم سپنس ستر و وٹ بیو ادہ پو ڈیر

ڈگہ تہ گہ ماضی ہند بن آثارن منز غاب یمن ڈراما ہن منز چھ ڈال صاب،
'چور بازار' ترے بٹہ ڈور ہتر ہتر۔

ہم کال کاشر ڈراما ہگ شروعات چھ و ہمہ صدی ہند ستر مس ڈہلس
ستر تمہ ادبی رویہ کہ تبدیلی ستر شروع سپدان میلہ کاشن اڈہن مارکسی فلسفہ
کس یک رنگی تہ decoloured یا بروٹھے ترتیب دتی مس فارمولائی تہ تنگ
دامن باڑوس پٹھ پڑھ پڑھ و پڑھ ہیڑ تہ تمودیت تہ اڈی انہارس رویس
تہ رُجائنس تن یس عالمس منز بچو۔ سائنسی تو اریخی، سیاسی تہ تیکنالوجی ہنزو
تبدیلی ستر انسانی فکر ہندس ازمن پٹھ بیون بیون۔ امہ نو فکری تبدیلی ستر گہ
پرائی ادبی رویہ تہ میزان زمینہ بڑی۔ اڈی امکانا تن ہند تلاش گلو جاری۔
تو موضوعات آہہ بارس۔ اجتماعی سوچ و طہ بدل آہہ انفرادی تہ ذاتی تجربن
تہ مشاہدن ہندس بنیادس پٹھ کایناتی صداقتن معاشرتی کھرن ہند نفسیاتی
تضاد چ تشریح کرنہ۔ پیتہ اڈہکو باقی شعبہ امہ انقلابی تبدیلی ستر متاثر گہ تہ
آہہ کاشر ڈراما نگاری ہندس فنس منز تہ انقلاب انگیز تبدیلی۔ متن رنگو، موضوع
رنگو، Text رنگو، setting رنگو، craft رنگو تہ treatment رنگو، کردارن
ہند رنگو تہ پوت منظر رنگو تہ نوہن تعلیم یافتہ لکھارن ہنز اکھ چھو کہ یمن ہند
مشاہد، مطالعہ تہ تجربہ سبھاہ وسیع اوس تمو پانہ ناویہ تخلیقی نثری صنف سبھاہ
سنجیدگی سان۔ یمن ڈراما نگارن منز چھ علی محمد لون، موتی لال کیمو، ہنسی نزدوش،
سجود سیلانی، اوتار کرشن رہبر، ہری کرشن کول ہتر۔ لوکن ہنز بار involvement

ڈراما ہن نسبت ڈپشٹھ آہے گوڈنچہ لہ کشر منز کشمیر تھیٹر فیڈریشن ناؤو ڈراما اُجمن ہند اکھ وفاق ترتیب دہے۔ امہ وفاقہ ڈس آہے واریاہ فیسٹول تہ منعقد کرنہ تہ اداکارن، لکھارن، back stage ور کرن ہند حوصلہ افزائی خاطر آو انعامات تہ بلبوسات دکھ تہ سز کرنہ۔ نہ صرف سرینگر منز بلکہ آہے ضلعہ ہیڈ کواٹرن پٹھ تہ معیاری تخلیقی ڈراما گندہ، تہ آہے drama festival منعقد کرنہ۔ اتھ فیڈریشن ستر وابستہ کیتھہ ڈراما کلب اُس کلاکینڈر تھیٹر، نورنگ ڈراما ٹک کلب، رنگ منچ ڈراما ٹک کلب، وسنت تھیٹر، سنگرمال تھیٹر، کالی داس تھیٹر، شاہ تھیٹر، منصور تھیٹر، کشمیر ویلی تھیٹر وغار وغار۔ کیتھہ تھیٹر گز وپو کو رومی سو تھرس پٹھ یمن منز رنگ منچ ڈراما ٹک کلب چھ سرس، ڈراما فیسٹولن ہند سز تہ یمنہ کوششن ہندس سلسلس منز آہے امہ تھیٹر کہ طرفہ دہلی، بمبئی، کلکتہ تہ جومس منز معیاری تہ تخلیقی طور سبٹھاہرتن ڈراما ہن ہند گندن ہاونہ۔ ستر مس تہ اٹھک مس ڈبلس منز یس چلے جاؤ کاشرس ڈراما ہس لوگ تھ متعلق چھ اکھ گہنہ مشق کاشرا دہب پنہ رایہ ہند اظہاریمہ آہے کران۔

”اتھ دورس منز لوگ کشر منز ڈرامہ لکھنس تہ گندس تیوت چلے جاوڑ باسان اوس اتھ اہم تخلیقی صفہ لوگ ووگہ ڈلن تہ کاشربولن والبن علاقن منز سپڈ ڈراما ہس احیائے نو۔ دوہ دینچہ زندگی ستر وابستہ ڈراما، آدمی تقدیرس تہ بشری صورت حالس ستر وابستہ ڈراما، قومی تہ عالمی معاملن ہندس پوت منظرس منز ووپدن وول ڈراما، فکر انگیز ڈراما، دنیا چہن بہلہ پایہ زبانن ہند ہن بہلہ پایہ فن

پارن کا شہر روپہ پیش کرن والی ڈراما۔ مآدانن منزوتن پوٹھ کیو آنکمن منز گندہ
 ینہ والی ڈراما، روایتی پاتھر کیو تاز تزا اشہ کھیلہ تہ دا نشورانہ چالہ epic رنگہ تہ
 بے معانیکی ڈراما تہ زانن والی ڈراما نو لیس، سٹیج کرافٹس ستر وابستہ مختلف ہونر مند
 بزرگ تہ تجربہ کار اداکارن لر لوروتھ وین تہ شوقہ ہتین نوجوان لڑکن تہ کورہن
 ہنر ہمہ تہ بیمہ ٹولہ۔ غرض اتی پوٹھہ چھہ سانہ ہمکال ڈراما ہنچ وانس پزی پاتھگر
 شروع گوہان۔

۷۰ پوٹھ ۹۰ تا م کس اتھ ابتدا یی ہمکال کا شہرس ڈرامہس منز بیم غالب
 نہجہ، تریہ یاروپہ موضوع اسہ در پٹھگر چھہ گوہان، تمہ ہیکو کھ یمن زمرن منز
 catagorise گر تھ۔

۱۔ ٹوی سماجی ڈراما

۲۔ ایپک تھیٹر (تواریخی پوت منظر والی ڈراما)

۳۔ تبسم تھیٹر

۴۔ اجنبیت چہ تھیوری پوٹھہ منی ڈراما Theory of Alienation

۵۔ تکہ گرتس منز نوہن تجربن ہند بازگشت۔

۶۔ Theatre of totality

۷۔ قومی تہ عالمی زبانن ہند بن مشہور ڈرامہن ہند کا شہرس منز ترجمہ کاری یا

منگتاؤن۔

یمن نوہن سماجی ڈرامہن ہندس فہرستس منز ہیکو کھ بیم ڈراما اتھ۔ لیل بہ

دزائیس لولرے (موتی لال کیمو)، بیلیہ وتن کھر چھ پوان، دستار (ہری کرشن کول)، شیشہ تہ سکستان (اختر محی الدین)، بہ پھس ژور (اوتار کرشن رہبر)، توتر کور (سجود سیلانی)، دبدو ژھ بندر (شملہ مفتی)۔

بیم ڈرامہ چھ سید سیو د کینو صحن معاشرتی مسائیلن موضوع بحث بناوان تہ نائری اندازس منز پیش کران۔ بلکہ چھ بیم بدلونین معاشرتی تقاضن ہندس پوت منظرس منز کھتو سماجی حقیقتن نسبت ڈرامائی کردارن ہندس صورتس منز اکہ نو Response تہ ذہنی رُویک باس دوان۔ کردارن ہند یہ رُویہ چھنہ doctored اجتماعی ذہنن تراپہ ہند بازگشت بلکہ ہمعصر صداقتن نسبت اُکس پر ڈھینن فردسند نفسیاتی وتلن تہ یوڈن، شکست تہ شک و شبہک اکہ نو دُنیا دریافت کران۔

تواریخی ڈراما

بناکھ اکہ اہم رجحان یس گوڈ کالہ کس ہمکال کاشرس ڈراما ہس منز نظر گودھان چھ سو چھ تواریخی صداقتن ہندس پوت منظرس منز بہنہ آمتہن کاشرن ہندس مقدرس، تہ تمین محرکاتن ہند ڈرامائی اظہار یمن ہندس پنچس منز کاشرن انزانی منز بدین بدین تہ سنگلین تجربن منز گذرن چھ پیؤمت تہ پتھ کال کس صداقتن ہمعصر صداقتن ہند روپ دھارن کرتھ یمن واقعاتن ہنز لگہ ہاری از تہ قائم تھاوان۔ یمن ڈراما ہن منز چھ سیا (علی محمد لون)، ژھاے

(موتی لال کیمو)، مگر وڈا سی (ہری کرشن کول)، بڈ شاہ بیتر بیتر۔

اسطوری ڈراما

تو آرنجی شعیب منتر ذہانتی مطالعہ کس تو آرنجس پٹھ زور دینہ ستی آئیہ
 تو آرنجی موضوعاتن منتر تم موضوعات تہ یم او تر او تر تام تو آرنج دانن نزدیک غار
 تو آرنجی آس یوان زاننہ، اتھ منتر چھ روایت، فوک لور تہ اسطوری بیتر، مگر نو تھقیقہ
 تلہ سڈیہ ثابت زین چین ہند مطالعہ چھ انسان سندا غلی روپیہ۔ تگر سندر
 عقیدہ، تگر سندا Ritual زانن چھ ضروری، تہ اتھ نوس تو آرنجی مطالعس ستی آو
 ڈرامہس منتر تہ انسان سندا غلی وجود زاننہ خاطر فوک لور تہ اسطورک استعمال
 ضروری سمجھنہ۔ فوک لور یا اسطورن ہند بو کردار و ستی چھ نوس ڈراما ہس منتر سہ
 ژہین پر و نچ کوشش یوان کرنہ یس انسانی شعور کین مختلف سو تھر ہن پٹھ لبہ
 چھ یوان۔ یم روایتی کردار چھ لوکن ہندس اجتماعی لاشعورس منتر آدن روین
 ہند بو نمونو Archetype رنگو موجود آسان، یین ڈراما ہن منتر آس اکہ نندن
 (محمد سبحان بھگت)، روپیہ رُود (سجود سیلانی)، آکاش پاتال (بنسی نردوش)،
 منتر لکے (موتی لال کیمو)، طوطہ تہ آنہ (کیمو)۔

مہمل ڈرامہ (Absurd Theatre)

یہ چھ زندگی ہنتر بے معنویہ ہند ڈرامائی اظہار۔ اگر زندگی ہند موضوع

بذاتِ خود نامعقولیتس پٹھ ڈرتھ آسہ، تیلہ چھ ڈراما ہک اظہار معقول تہ با معنی بناؤن غلط۔ لہذا آسہ تم ڈراما لکھنہ یمن نہ بظاہر کاٹھہ ہوٹ لوٹ اوس۔ مگر کلس پٹھ آسہ یمن نادید تہ اوچھ حقیقتس گن تہ اشارہ کران، یمن انسان ہند مقدر بنیمتر چھ۔

یمن ڈراما ہن مثر چھ آدم حواتہ ابلیس، تقدیر ساز (علی محمد لون)، پاتھر ساز (محمد سبحان بھگت)، تجارتک آسان طریقہ (ہردے کول بھارتی)، ہری پٹھو (نثار نسیم)، راتہ کرہیل (سجود سیلانی)، حرم خانگ اُنہ (موتی لال کیمو)۔

استعاراتی یا علامتی ڈراما

امہ قسمہ کین ڈراما ہن مثر چھ روایتی ڈراما Setting کردار تہ اظہار تہ باقی ول تہ ڈپڑ تہ غار ضروری باسان۔ پرتھ کردار یا Setting چھ اکہ Symbol رنگو یا استعارہ رنگو ووتلان۔ واقعاتن چھ بظاہر کاٹھہ تسلسل آسان۔ کلس پٹھ چھ Focussed/ Object تہ کردار اُس تن، Setting اُس تن یا کاٹھہ عنصر، اکہ Metaphor بپتھ بوزن والین یا وچھن والین ہند ظون پانس گن پھران۔

لگہ پاتھر اسلوب

کس نظریہ کس پوت منظرس منز آیہ لگہ پاتھر کس کاٹھ کرس منز واریاہ ڈراما
 تحریر کرنہ تہ گندہ۔ یمن ڈراما ہن ہندس پلاس خاطر اوس نہ روایتی ڈرامہ
 ہگ مستند ماحول براہ کیشہ، لہذا آیہ بیم ڈراما لگہ پاتھر کس فارمس منز گندہ۔
 تھن کردارن ہنز عملہ تہ اظہار باپتھ وسیع پوت منظر ڈکھس رؤتھ وائسہ ہند
 تاریخی ژھن مشرأ و تھ تو ثراتی سوتھرس پٹھ اکہ غار مربوط انساننی زندگی ہند
 ڈرامائی گندہ۔ یمن ڈراما ہن منز چھ ناک گرو بند (ہری کرشن کول)، طوطہ تہ
 آنہ (موتی لال کیمو)، کان لچا پاتھر (فاروق مسعودی)۔

عالمی تہ قومی ڈراما ہن ہند کاٹھس منز سنکستاؤن

دانشورانہ سوتھرس پٹھ مختلف ادبی تہ فکری نچس، رُوین تہ رجحان ہنز
 نشاندہی کرن واکر عالمی تہ قومی نوعیتکو مشہور ڈراما آیہ کاٹھس منز پانہ ترجمہ کرنہ
 نتیہ آیہ تم Adopt یا منگتاونہ۔ یمن ڈراما ہن ہند بدولت سپدی کاٹھری تماشہ بین یا
 پرن واکر عالمی سوتھرس پٹھ کاڈ کڈان واجنہن مختلف فکری تزاین ستر متعارف۔
 یمن ڈراما ہن منز آے Ibsen چیخوف، برخت، گرش کارناڈ، بادل سرکار، بھیشم
 سہنی، ٹیگور بیتر ڈراما نگارن ہندی ڈراما کاٹھس منز ترجمہ کرنہ۔

تھ منز چھنہ کانہہ شک زنمتہ پتہ یوس غار یقینی تہ عدم تحفظک ماحول کشر
 منز یادگو و تمیک براہ راست اثر پیو ویدتہ چہ تھیر تحریریکہ پٹھ تہ۔ مگر یہ تہ چھ پرز
 کاٹھرو ہمعصر ڈراما لکھارو، ہدایت کاروتہ اداکارو تھوونہ پن تخلیقی شوق تہ قلم

حالاتن گروی بلکہ گریکھ تھکر تجربہ ڈراما ہن مٹز Craft/ Setting/ Text/ Content تہ موضوع کہ حوالہ تہ یمن ڈراما ہن ہند حوالہ آونہ صرف علاقائی پریسس یا قومی پریسس مٹز موضوع بحث بناونہ بلکہ آپہ کیشہ ڈراما عالمی سوتھرس پٹھ تہ Recognise کرنہ۔ لہذا تھ ونہ نس مٹز چھنہ کاٹھہ صداقت ز ۱۹۹۰ پتہ گو و کاٹھر ڈراما زوالگ شکار بیلہ زن ۱۹۸۰ سنہ اوس ڈراما تحریکہ ہند حوالہ کاٹھر ڈراما ہنک تہر۔ ہاں یہ کتھ چھہ صحیح تھہٹہ کہ حوالہ آونہ سوتھر رتکیا ز ڈراما باپتہ چھہ و چھن والبن ہند عمل دخل ضروری تہ بیلہ کشیر مٹز زون کرن اکھ کر پٹھ عمل اُس۔ یمن حالاتن مٹز گپہ پزی تماشہ ہین تہ اداکارن درمیان اکھ سبٹھاہ مٹز ن کتھ پادہ..... مگر ڈراما گندن تہ لیکھن عمل گپہ نہ زانہہ تہ مکمل پاٹھ کر روٹہ۔

دویم یوس صداقت ہمکال ڈراما کہ حوالہ گڑھ باونہ تہ تہ گو و سانبہن ہمکال لکھارہن تہ دویمین Stake Holder ہند مٹالی جرت مندی۔ پیتہ گو و تہ بے وقت موت عصری زندگی ہند Living Metaphor ہنٹھ۔ زندگی ہنز سارے دلچسپی گپہ یہ دوتھ تہ سانبہ لکھارہ لیکھ کر تہ اداکارو گندہ تم ڈراما تہ بیم عصری زندگی ہنز و کھہ حقیقون ہند سپد سیو، علامتی آپہ یا تمثیلی طور ترجمانی اُس کران۔ بیم ساری ڈراما ہسکن نہ صرف اُس کس ادبی تو ارنج دان ہند خاطر ادبی رُحانن ہند بد کڈنہ خاطر معاون ثابت سپد تھ بلکہ پگہہ کس تو ارنج دانس باپت چھہ یمن ڈراما ہن مٹز گپتھ واریاہ اوچھ Evidence، یمن ہندس بنیادس پٹھ سہ عصری تو ارنج نسبت Gapes پوتھ ہیکہ۔ یمن ڈراما نگارن مٹز چھہ

بشیر دادا، نثار نسیم، ڈاکٹر موتی لال کیمبو، مکھن لال صراف، سید یعقوب دلکش، محمد امین بٹ، شوکت شہری، ڈاکٹر ریاض معصوم، ارشد مشتاق، منظور احمد میر، محمد یوسف شاہین، مشتاق مہدی، غلام نبی شید اوغار و غار ناوہ سنس لایق۔

دمیہ کوٹھر، زمانے پوک نہ ہدم، ملیہ خاش واتہ ضرور، ڈھل، شناختی کارڈ، اپریل فول، الگڈی ملگڈی، کزبکہ ناد، للہ وڈی دگ بیتر چھ تم ڈراما ایم عصری کرس، وانج کورن واجنہ کزبکہ نادر، راون تیلکس، شناخت کس ڈھانڈرس، بے اند تلاشس، انسانی حقوقن ہنڈ جبرک، تقسیم در تقسیم سیاستگ، بے یقینی موت تہ تضاد، تشددس تہ انتظارس ووکھناوان چھ۔

۹۰ پتہ کس ڈراما ہس منز چھ زیاد تر Drama of Protest غالب موضوع رؤد مت۔ یہ Protest چھ کاشر بن پنڈت لکھار بن ہند بن ڈرامہ ہن منز لبہ پوان، بیوکشپر پٹھ ہجرت کر تہ چھ پنہ بن مولن نش ڈھبہ گروہنچ دگ وپراوان تہ کاشر بن مسلمان ڈراما لکھار بن ہند بن ڈراما ہن منز تہ میلان مگر Protest تہ منزل (Target) چھ دوشوئی ہندا لگ الگ.....

بیاکھ اکھ Trend یس ہمکال ڈراما ہس منز نظر گروہان چھ سہ گوو Body ڈراما چ۔ یمن تجربن منز چھ مکھن لال صراف، سوہن لال کول تہ بشیر بھوانی ٹو ٹوئی تجربہ کران۔

ڈراما کس اتھ تلکلیکس تحت چھنہ نہ Setting آسان، نہ چھ ڈایلاگ تہ نہ چھ کاٹھہ عمل بلکہ چھ ادا کار سندی Body Gestures تہ تاثر اتو ستر اکھ

اشاراتی ماحول تعمیر سپدان تہ وچھن وائل سُنڈ ذہنی تہ فکری ادراکس چھہ نچن تام
واتس مئزر ہبری کران۔

بیا کھ اکھ نو Trend یس کاٹھر ڈراما کہ حوالہ حال حالے شروع سپد تہ
گو و Academic Drama۔ اتھ عملہ مئزر چھہ ڈراما کہ ذریعہ طالب علمن
ہند بن مختلف زمرن ہنزن داغلی Abilities ڈرامائی Medium ذریعہ
دریافت کرنچ کوشش یوان کرنہ، یتھ زن بچہ سنز کلیم Personality، تکر
سنز ذہانت تہ Text ہک بار خوشیون، تہ فرحت انگیز ہیکہ بٹھ۔ ہم گوشہ چھہ
ارشد مشتاق تہ اکر سُنڈ گروپ ذریعہ درشاوہ یوان۔



غلام نبی آتش

جامہ گلکاری پھلکاری چھاکر

نفاست تہ نزاکت تھاون وول پوشاک چھ پڑتھ زمانس منز امیرن تہ
 حسین باگہ یوان آمت۔ عام لوکھ تہ لاگہ ہن یتھ پوشاک مگر پاتھان اوسکھ
 نہ۔ یو دوی مرد تہ زنہ، دو دوی ورگ امہ قسمہ کہ پوشاک کو گروید آسان چھ مگر
 خوتون چھ رنگدار، اولر زاولر، نفیس تہ نوزک پلو زیاد پسند۔ کثیر منز استعمال
 کرنہ پنہ والبن سارنے پلون ہند تفصیلی تذکر چھنہ کتابن منز موجود۔ تکیاز
 یس پلو ورتاؤ نہر گوو، میچ جائے رٹ ٹوری پلون۔ یہ سلسلہ رو دچلہ ون۔
 پڑائبن ہند ناوتام گئے مشھ۔ وں گو وون جاین وون دتھ تہ ژھار کر تھ ہیکن
 یکن مشر پھ گامتنن تہ ورتاؤ نہر سپدی متبن پلون ہند ناوید کڈنہ ہتھ۔ اکھٹے
 پاتھ تہند پنہ زمانچ اہیت تہ افادیت تہ، لگہ ووتر تہ شاعرن ہنر شعری تخلیقہ۔
 خاص پاتھ چھے رومان پسند شاعرن کینہہ نوزک تہ نفیس پلو رومانوی معنی سن
 منز ورتاؤنس منز پور پھلاوٹھ آہو۔ تم چھ یمن پلون منز محبوبہ سند زبردس ماری
 مندیت وچھان، ژینان تہ چھاوان۔ اکھٹے چھ اتہ روایتی گھنن ہند ناوتہ
 ماری منزرتہ محفوظ۔ یکن شاعرن منز چھ رسول میر شاہ آبادی، محمود گامی،

عبدالاحد ناظم بیترگو ڈنگہ مٹھال۔ نی تون رسول میر شاہ آبادی سُنڈیہ شعر:

کامہ دیوس شو بان ناکی
جامہ گلکاری پھلکاری چھال
اُلی وانگن تل اُلی کن تے

ونتے لو

کامہ دیو چھ حسن، عشق تہ شہوتگ دوتا۔ کاشر شاعری منز چھ محبوب
سُنڈس معنیہ یس منز ورتا ونہ یوان۔ ژکہ چھ یہ دیو مالائی کردار۔ ہتھ شعرس منز
چھ کامہ دیوس جامہ ناکی، یمن منز سہ شو بان چھ۔ جامہ دیوتھ گولباس،
پوشاک۔ زیوٹھ تہ کھول دامنہ کرتھ سجاوتھ پوشاک۔ جامہ چھ رقص کرن
والین ہندس رنگا برنگی کھلہ ڈلہ پلوس تہ ونان، یس نزن ڈالوستی زنتہ آربناوتھ
گہری بچہ کران چھ۔ یہ جامہ چھ بچہ کڑی ازتہ لاگان۔ چھٹھ کرتھ کپرس تہ پوش
بناوتھ پشمینہ شالس چھ جامہ وارونان۔ رسول میر شاہ آبادی سُنڈس ہتھ شعرس
منز چھ معشوقس جامہ گلکاری، پھلکاری تہ چھالکی۔ یاں زسہ پلویا تم پلویمن پوش
آسن بناوتھ، پوش آسن لاگتھ یا پوش آسن چھاوتھ، گئے گلکاری۔ پھلکاری تہ
چھ یی معنیہ تھاوان۔ ”پھول کاری“ مطلب سہ کپری ہتھ چھٹھ آسہ پوشن ہنتر
کھارنہ آہو۔

رسول میر شاہ آبادی سُنڈس و قنس (رسول میر: وفات ۱۸۸۹ء) منز چھ
اشرفن تہ حسین منزامہ قسمہ کین پلوان ہند رواج اوسمت تہ بیم اسی کینہہ کشیر

منزے اچھ کسپہ بستی پارانہ پوان تہ کیشہہ اسی ہندوستان پٹھہ پوان۔ پتھ رُو ز
چھاکی۔ چھاکی اُس مملکو چتر یوسہ جالہ ہندکی پاٹھکی زڈکی دار اُس آسان (محمد
یوسف ٹینگ: کلیات رسول میر، ص: ۲۴۳)۔ پروفیسر غلام محمد شادان چھ
لیو کھمت:

”چھاکی: چھال، زال، ز اوجہ مملکہ ہنڈ زڈکی دار ساڑی، بزبان رسول
میر، ساکی یا کھاسہ۔ ساکی چھ ساڑی لفظ ابتدا یی کا شمر پھور۔ یہ آہ پنجاب
پٹھہ کشر۔ پیتہ آسہ گوڈ حافظہ نونہ و زیمہ کلس پٹھ تھاوان۔ پتہ اسی چھکر چہ تہ
ساڑی کلس پٹھ تھاوتھ نزن ڈالہ دوان“۔ (کلیات رسول میر، ص: ۲۵۰)

شاعر و خاص پاٹھکی رسول میرن چھ یم پلو یسلہ پاٹھکی پنہ شاعری منز
ورتاوی متری۔ از چھ خالے کائسہ ”ساڑی“ لفظہ وراے یمن ہند ناوک پئے۔

کامہ دیوس شو بان ناکی
جاچہ گلکاری پھلکاری چھاکی

(رسول میر)

ہٹہ کائٹھ مال چھے بنگاکی
گل آفتاب کنہ پھول
ووڈ شو بان چھے ساکی جاکی
باکی مریے نے روش

(رسول میر)

چاردان تے کاٹھ مال
تس کتر جھم کنہ واکریے
کنہ پھلو بنگالو چھال
سالس ان تے ہاڑیے

(رسول میر)

کنن واکری زاکری وانکن تل
وڈنی ساکری چھاڑی چھ لمل

(رسول میر)

اکری کنن چھی مونختہ نالی
ساکری وڈنی یو صاف جالی
ناکری شہی نئے زری جائے
ناکری شہی نئے زری جائے

(محمود گامی)

ساکری ووڈنی تے واکری کن
زاکری وانکن چھی پیچ تابو

(محمود گامی)

خاص پلو آسی کھناب تہ سنجاب کپڑا آسان۔ امہ کپڑا کن پلو ان ہنڈا کر
تہ چھرومانوی شاعری منز پھری پھری آمت۔ مثلن:

زلفِ تلو روے گلیہ منڑ آفتاب
 چھا کر شبنم ناکر چھے کمنجاب
 سہم تن تے خوے چون سیماب
 بول گلیکی لول چون آئے



واکر کن ناکر کمنجاب
 زاکر مس طاقین چھے ڈری
 ووتھرن چھے سنجاب
 بے تاب گرتھس سوٹھری

(رسول میر)

سنجاب چھ اکھ قیمتی کپڑ، یس نرم تہ آرام دہ آسان چھ۔ حافظ شیرازی
 سند مصرعہ چھ: ”خفتہ بر سنجاب شاہی نازینے راجہ غم“ (کلیات رسول میر: محمد
 یوسف ٹینگ: ص: ۳۱۰)، مگر پروفیسر غلام محمد شادان چھ لیو کھمت..... ”سنجاب
 چھ لگر پینڈ کھوتہ ہناؤ ڈپہن جانور۔ عربی پاٹھر چھ اُمس ”قائم“ ونان۔ مسلہ
 چھس آسان سفید، پتھ قبا، چونہ وغاڑ بناوان چھ۔ یہ مسلہ چھ نرم آسنہ کنڑ
 واریاہ قیمتی۔ اتھ مسلسل تہ چھ سنجاب ونان“۔ (کلیات رسول میر: غلام محمد شاد،
 ص: ۲۲۸)۔ کمنجاب چھ سہ کپڑ، یس ریشم تہ سونہ تار رلا و تھ ووننہ پوان اوس۔
 پلون متعلق چھ رسول میر ن یہ بند سبٹھے معنیہ خیز:

واکر کنہ نے چھی موختہ زالی
 بالکر کنہ نے گھنہ پاراو
 ناکر جامہ چھی مہرو ماتی
 بوز تتی لول چون او

”مہرو ماتی“ چھے اکھ عجیب ترکیب، یتھ ٹینگ صاب تہ شاد صاب دو یو
 عالم تشریح کاروا لگ الگ معنیہ کڈر تہڑ چھ۔

”مہرو ماتی“: اُز کہہ ”سونا چاندی“ کپر کر پٹھر اکھ پڑون کپر، یس
 ککھاب چھٹہ ہند آسان اوس، اصل ناو: مہرو ماہ۔ (کلیات رسول میر، محمد
 یوسف ٹینگ: ص: ۲۱۷، حاشیہ)۔ مہربہ معنی محبت۔ ماتی بمعنی سرشاری، مطلب
 تہڑے چھی لو لکو تہ مستی ہندری جامہ ناکر۔ امینگ معنیہ چھنہ سونا چاندی کپر۔
 مہرو ماتی چھنہ کپر ک ناو۔ (کلیات رسول میر: غلام محمد شاد، ص: ۲۶۵)

ڈور کھاسہ تہ چھ اہم مانہ اوسمت یوان۔ کھاسہ لفظ چھ از تہ ورتا ونہ
 یوان۔ یہ چھے سوو ڈنی یا پوڑ، یوسہ اوج ز اوج اُس آسان مگر نیلہ اتھ و پچھ تہ
 نمایاں رکھ آسہ ہن نیلہ اُس زیادے خوبصورت تہ خوش پوڑی لگان۔ رگھے
 پوت نہ بلکہ آس دشن ہندری پٹھر ڈھو چہ ڈورالو ہند آسان۔ یمن بعض اوقات
 جالار ہیڈ ووتھ آسان اوس۔ اوے چھس ڈور کھاسہ ونان۔ خو تو نہ آسہ
 پاراوس ہر بر کرنہ با پتھ ڈور کھاسہ وو ڈیوان:

سور ساس ملتھ سانہ آنکھو ژاکھ گوپالی

دوڑی کھاسہ دتھ برطاق اءسس گئے سہ وُبالی

(رسول میر)

ٹاکاڑی چھے ٹوپی، یوسہ وں ورتاؤ نہر گمڑ چھے۔ گجر کی خوتونہ یو دوسے وُنبہ
تہ ٹاکاڑی یا امی چالہ کامہ دار ٹوپی کلس دوان چھے، تاہم چھ عام کاشترہن مٹروونی
امیگ روانہ آسنس برابر۔ ٹاکانہ ہنز نزاکت تہ خوبصورتی اُس اتھ قابل توجہ
بناوان۔ طاقانی، طاقین یا ٹاکاڑی چھے ژکہ سو ٹوپی یا نگلاہ یوسہ مرد دستار س تل
تھاوان اُسی۔ امیگ آگر چھ عربی لفظ ”طاقیہ“۔ مؤلی چھے یہ وونی پوٹ یا زری
چھاؤتھ زنانہ ٹوپی، یوسہ گول چھے آسان تہ تھز ر بجالیہ چھ ہنا ژ پٹ آسان۔
یمن اوس کلابوت تہ گاڑ تہ یوان چھاوہ۔ لوکچین کورہن ہنز ن ٹاکانہ اُسی
غلطنہ تہ تراوان الوُند۔ بیمہ خاص ٹاکانہ مہرین ہند خاطر بناوہ یوان آسہ،
تمن اُسی یوان سوہ ہند یاروہ ہند کی تعویذ یا ہنگہ طماہ لاگہ۔ تھ پٹھ پوڑ
اُس آسان۔ پوڑ اوس آسان پاڑی انزول بناؤتھ۔ پھہرہ کس دامنس یا پوڑ
یس ائدن دوو، طلہ یا پوٹ چھاؤتھ آسان چھ، تھ تہ چھ انزول ونان تہ اگر
پوڑ، ساڑیا دجہ پائیگ جالار آسہ دامنس مڑتھ، سہ تہ گو وانزول:

ہشہ لوہنم ز اوجہ مورے
پوڑ ژوٹنم پاڑی انزول
گڑھ مالین تم جھم دُورے
مے چھ مورے للہ وُن نار

(رسول میر)

پتھ کالہ اُس مہرینہ وردس منز ٹاکاؤ ضرؤ رشائل آسان۔ امیگ ذِ کرچھ
 سانس ونہ ونس منز بھری بھری کرنہ آمت۔ سانوشا عرومنز چھ بعض اتھ کلہ
 وکرتہ علاؤ وس تہ گنڑراوان۔ یہ چھے خوبصورتی ہنز علامت۔ تہنڈ مارموت چھ
 ٹاکاؤ ووڈتھ زبردس مارو مؤندتہ ٹاکاؤ اگر عام ورتاؤ نہر گئے تہ مگرشاعری منز
 چھ امیگ مارو مندیت تہ چمہ خمہ محفوظتہ اُس ہسکو اتھ وؤن دتھ:

وِکس	کلیہ	جگنوار
مویس	موجتہ	چچی
گل	افتابہ	سنبل
چکر	پارہ	پتاماو

(عبدالاحد ناظم)

کالہ مویس ٹاکاؤ چھے برسر
 فلولہ نافی مؤلمت مشک ادفر
 ہینیز پاران ژوٹو تے دلیہ لولو
 رندہ پوشہ مال گنڈنے دزایہ لولو

(رسول میر)

چھے ڈری طاقین نتہ درشب پری

(رسول میر)

اسہ چھ وؤر یا اور تہ اکھ متروک لفظ، تہیمپنگ نیب شاعری منز میلان
 چھ۔ دپان امیگ آگر چھ فارسی لفظ ”اورہ“۔ معنی چھس قبا، چونہ۔ اتھ وائیکھ
 کاشرس منز بیہ تہ واریاہ معنی۔ مثلن کھون، لوکٹ لیٹف (یُس ووزی صرف
 لیٹفہ ہنز وور تام موٹو موت چھ) تہ یہ لفظ چھ پلوک معنی تھاوان۔ مگر وار وار
 پشڑ کھ اتھ لئاوٹک، کھونہ منز گور کرنگ تہ لولہ لئاوٹک معنی:

روز و شب روزہے آیوے
 روزتم اور منز للہ وتھ
 ژوژ چھسے مئی، ہیو مہے
 کو گرتھس مہے بو

(محمود گامی)

شری پانے گوڑ کرے
 اور منز ہتھ مؤر لولو

(رسول میر)

ماکر ماجہ رچھنس لولہ کیا اورے
 ساسہ پڑ ژوژ آسم للہ وان

(حیہ خوتون)

اور منز بہ کرے گوڑ گوڑ

(رسول میر)

کتابیات

- (۱): کلیاتِ رسولِ میر، مرتب: محمد یوسف ٹینگ، کلچرل اکیڈمی، ۱۹۸۴ء
- (۲): کلیاتِ رسولِ میر: مرتب: پروفیسر جی ایم شاد، اشرف بک سینٹر سرینگر، ۲۰۰۴ء
- (۳): کلیاتِ محمود گامی، مرتب: ناجی منور، کلچرل اکیڈمی، ڈویم ایڈیشن



ڈاکٹر غلام نبی حلیم

احد زرگر..... عشقہ زولانس اندر

عشق و محبت بیتھ اسی کاٹھری پاٹھری لول تہ ماے بیتر ہوں لفظ و وقت کران
چھ یاسید سیو دیپے ترکیب یاں ز اصطلح یسلہ پاٹھری ورتاوس انان چھ، تہ دوتھ
چھ مطلب سہ تصور تہ سہ انتہائی نفیس، باڑودار، وسیع المعنی تہ و پھوار انعام الہی
یس بعض اہل سخوتہ ارباب ذوق و نظر و حضرت انسان سید کلہم بقائہ انسانی ارتقا
باپتھ لوم مومنمت تہ گزروومت چھ۔ آدمس انسان بناوس منز تہ انسانی بیون
بیون منزل تہ پڑاوپراوس تہ حاصل کرنس دوران چھ یو ہے عشق و محبت سالار
کاروان پتھ آدمی مرس رہنمائی ہند کار عظیم انجام دوان۔ بیلیہ بی آدمس عشقہ
زولانہ ناکر گروہان چھ سہ چھ دنیا و ما فہا نشہ باخبر سپدان، پرتھ چہڑک بغور
مطالعہ کران تہ پرتھ چہڑکس نفع تہ نوقصانس اٹزی مٹزی گروہان تہ اد ہر گاہ سہ
کاٹھہ کارنامہ انجام دوان چھ تھ چھس عشقہ تہ لولہ کہ برکتہ حیات دوام عطا
سپدان۔ لول تہ عشق چھ عاشقس مرس مرس سزان تہ تس سٹند غذا پتھ تس
حیات جاودانی بدس کران تہ چھ کاٹھری گونما تھ لول دب پتھ پاٹھری و نان

لولہ کہہ وو کھلہ وانج پشم

کوکل ژجم تہ پٹھس رسہ

پشم تہ پشم تو پتہ ژشم

کو زانہ تمہ مٹر مرکنہ لسہ

تہ اٹھو تصورس چھ علامہ اقبال سیمہ انداز محسوس کران

مرد خدا کا عمل، عشق سے صاحب فروغ

عشق ہے اصل حیات، موت ہے اُس پر حرام

انما پوزہ عشق یاز لول یس انسانہ سبز گلہم ترقی، روحانی پاپر جانی، ذہنی

سکون، سوکھ شہلہ تہ ارتقاء باپتہ لازمی چھ سہ چھ صرف تہ صرف عشق

رسول ﷺ کہہ تو سئل تہ برکتہ نصیبہ سپدان تہ ہر گاہ بنی آدمس عشق رسول

ﷺ بدس آوتہ تکر کو رسورے حاصل۔ یوت تام امہ حقیقی عشقک سوز و گداز

انسانس منز موجود روزتوت تام چھے تس حقیقی زندگی بدس۔ یو ہے عشق چھ سہ

لازوال تہ لامثال طاقت سیمہ مٹر ا کس انسانس یقین محکم، ایمانچ پختگی تہ

تحفظ میلان چھ۔ اوے چھ علامہ اقبال نصیحا فرماوان

مصطفیٰ بحر است و موج او بلند

خیزو ایں دریا بجوے خویش بند

یک زماں خود را بہ دریا درگن

تارواں رفتہ باز آید بہ تن

یعنی محمد مصطفیٰ ﷺ چھ بحر ذخارِ تیممہ چہ لہر آسمانس تام پلن کران چھئے تہ
 ژتہ وس اتھ اوٹھہ رسی تس سُدرس یٹھہ زیر آب سپدکھ تاکہ نو زندگانی سپدی
 نصیبہ تہ چون تہ سورے یہ ژئے مادی دُنیا ہن مہتھہ نمٹھہ چھئے سپدی نو سِر بدس۔
 امہ موخسر تمہید کہ اُنہ مژدی ہر گاہ وُ چھوتہ یہ ونہ نس چھنہ چارہ زا حد زرگر
 یس اسی بعضے صونی بعضے درویش تہ بعضے فقیر گزیران چھن چھہ ژ کہ عرفانی وتہ
 ہند وتہ گتھ یس اتھ سز نہ سز نس سُدرس ژھائٹہ وڈتھ تہ کماقہ اُنژدی مژدی تہ
 گو و۔ سوال چھہ ووتلان ز زرگر اوسا صونی کہہ نہ یاز سہ مانوناہ صونی کہہ نہ، سہ
 چھہ فقیر کہہ نہ..... پوز میانی کنی چھنہ اتھ سوالس سنن زیادہ ضروری تہ کیا ز اتھ
 سوالس سنن تہ اتھ پٹھہ بحث و تحیث کرن گو آب منڈن تھہ کتہ پیہ تھن۔ ووں
 گو و ز تھکن ضرورتہ قیمتی وق ژلہ زالبو کنی۔ حالانکہ ہر گاہ ز اوجارس سو فقیر چھہ
 ژ کہ عشقکے یاز لولہ کئے اکھ در دور تہ مستحکم روپ تہ انہار۔ علم یو دوی وسیع
 المعنی چھہ یٹھہ ساسہ یو دلنگ لنبہ چھئے مگر علم ینیلہ حقیقتن ہندس مولس تام واتہ تہ
 سر بستہ اسرارن کھولہ، پوشیدہ رازن وورن تیلہ چھہ سہ علم محبوب تہ وونی ہر گاہ
 علم محض کتبہ تاپے رسائی آسہ تھاوان تہ گوجہ سنراونہ ینیلہ چھہ سہ علم مردود۔ علم
 چھہ پزی تھد تھو دتہ امیر یس عقل روشن کران چھہ، پوز فقرک مقصد چھہ قلب و
 نگاہ چ پاکیزگی۔ علم چھہ عالم تہ فلسفی بناوان پوز فقر چھہ مسیحی تہ کلیسی صفتا بدس
 انان۔ فقر چھہ عان واقف راہ تہ اتھ بروہنہ کہہ چھہ تمام احوال تہ مقام اُنکو
 پاٹھو بوزنہ یوان۔ اہ ینیلہ فقر عشقک انہار مانون ینیلہ چھنہ یہ ونہ نس منز قباحث

ز زگر عبدالاحد چھ راہ عشقک مسافر یس عشقہ زولانہ ناگر گوتھتھ فقر چہ رز
تھہہ پٹن حقیقی تہ ازلی محبوب، معشوق تہ مدُن اُنڈری بدن ز اُلتھ اُمہ
پُر پیچ سفر کر کتھہر ژینہ ناوان، ژہتر اوانان تہ مُشاہد کرناوان چھہ
پہر بل کی تہر پھلو چھم لار لاری تھہ دلس
زیرو بم مضراب کھبتھ آس ژاس مے خالس اندر
تہ لولہ مے خالس اُتھ چھہ یہ معرفتک وتہ گتھ تہ طالب پٹن پان معرفتہ
مے متری غوطہ وان تہ اِد بدس تھہ پنہ نبن تہ پردن مگر لولہ گراکن با گران سہ تہ
ہر و ز نیمیک یہ پانہ تہ اعتراف کران چھہ

شولہ وُن مے روز و شب چھس لولہ بڑی تین با گران

تولہ کوتاہ لولہ خم خان، پور مے پیانس اندر

معرفتہ مے یاز عشقن مس چبتھ چھہ طالب معرفت یاز عاشق لاشک فقر کڈری
جامہ و لٹھ فقر کڈر پیچ، پیچید مگر پُر لطف تہ مست کر کتھہر ژیشان، ژینان تہ
فقر کس کیف و حالس منز گرد کم سیدتھ ترقی ہند بن مدار جن پٹھ گامزن سپدان
تہ اِد چھہ علم تہ فقر وجود تہ موجود کس کس حقیقتس منز گنہ گنہ پنچس تام واتان پوزیم
دونوے علم تہ فقر چھہ اکھ ا کس نشہ بیون آسان۔ بقول علامہ اقبال

فقر مقام نظر علم مقام خبر

فقر میں مستی ثواب علم میں مستی گناہ

یوہے قونون قدیم ورتاوتھ چھہ ز زگر عبدالاحد عشقہ باز رکس اتھ و اناکھ

پوز پاپدار انہارس مٹو یعنی فقرس مٹو گنڈنہ یوان۔ سہ چھ فقر کلمن سرحدن تام
رسائی پزاوان تہ مستی کار ثواب ز اُتھ فقر کی اصول تہ آداب رچھان، تمن ہنڈ
پاسدار بنان تہ تمیگ نہ وانہ اعلانہ کران

الفہ کس دپنس اندر چھس لامہ گئے مذہب رچھان
مہم سے زرگر وچھان آو احد کس شانس اندر

پوز اتھ کمالس و اُتھ چھنہ عبدالاحد زرگر پنہ نس پانس کانہہ مرتبہ
دوان یاں زسہ چھنہ پنہ نس ریاضس تہ محنتس دا یراوان بلکہ چھ سہ یہ سورے
پنہ نس پیرس تہ رہرس مطہ کھالان۔ سہ چھ تس انتہائی مرتبہ دوان تہ تس
نبی ﷺ ہنڈ گز نڈوی مانان۔ امیگ اعتراف چھ سہ ا کس ماری مٹس اندازس
مٹز کران

لب بستہ کن خاموش باش گاہ دید گاہے گوش باش
رب یاد کرن باہوش باش گاہ دید گاہے گوش باش



چھم چون نبی پیر مغان رُم زہد کر و نم بے گمان
نم نوش دؤ پنم نوش باش گاہ دید گاہے گوش باش

احد زرگر چھ عشقہ زولانس اندر رہنہ پنہ پتہ باہوش و حواس خمسہ عشق دانہ
دانہ تہ ہرانہ ابتاع کران۔ تس چھے پاری زان آسان زندہ ہب عشق اُپنہ سازی
کتھ چھ ونان تہ امہ عشق کو تقاضہ کیا چھ؟ عشق چھ عاشقس تیلی کامیابی عطا

کران بیلہ سہ عشقک پاسدار آسہ۔ تس گڑھ، پئے آسن ز عشقک مدعاتہ مقصد
چھ محبوب الہی یس تام رسائی حاصل سپدنی۔ یہ چھ سہ لول تیکر نباتات تہ
حیوانات غرض ذرذرات کریشاؤر۔ یہ عشق چھ قرارس بے قراری تہ سوکھس بے
سوکھی عطا کران۔ پوزا تھ بیقراری تہ بے سوکھی اندر چھ عاشق لطف ازلی تہ
حقیقی مز پر اوان۔ زرگر چھ امہ زولانہ ستی سہ کر چھر ژینان، تس چھ رڑھ رڑھ
یہ لولہ نارژن کر تھ بر بکھ انان تہ امہ کر چھر ک چھ سہ سر عام اظہار کران

بوزی بوزی عاشق دیوانہ گائے عشقہ اکہ نوقتے
دیے لانس کیاہ سناہ لیو کھ نم مو یے چھم نہ قرار



سز تھ چہہ یس گڑھ ہتھ بدنس ڈتھ پنیہ مو یے مو یے
پڑتھ پننے ماز پانی پانس پڑتھ کر نہار
پیتہ نس چھ یہ کتھ وٹو ضروری زا حد زرگر سہندس سار سہ کلامس بیلہ یہ
غایرانہ انداز زول دمو یہ ون چھ لائم باسان زا ہندس کلہم منظوم کلامس منر چھ
عشق تہ عشقہ ناریاں ز لول تہ تھ ہیوی چیز اکہ وسیع تہ عریض انداز پور جہار
بتھ پیوستہ تہ بیمہ اصطلاح ورتا ونگ انداز تہ بیون تہ بدل یس سیند سیو دا ہند
عشقہ گراک تہ لولہ موت آسنک غماز چھ

مورس یہ مگر ازارن گس تھا وگن مے زارن
یو دونہ سنگ خارن گڑھ چاک چاک افسوس

عشقِ مذہب اختیار کر کن والین دینِ سندھن ٹاٹھن یو دوی عشقِ بازرں
منز کر آٹھگی، ز آٹھگی تہ و اناکھ منازیل تہ مناظر و چھن تہ طے کرنی پوان چھ پو ز تم
چھنہ قطعاً تہ و تہ ڈلان تہ نہ چھنہ تمن امہ و تہ نشہ کاٹھہ چلہ تہ بہانہ بازانان:

موت یہ دل میون کوت سنا عشقن نمٹھ

پوت پھرن وتم کمیؤ بہانہ تے

مگر یہ کتھ چھے ہتھ فیصدج زیس عشقِ نس نروس گڈن وول صاحب
درد تہ مرد حق آسان چھ، سہ چھ ہر و ز خالق کایناتس کن استعداد تہ التجا کران
روزان تہ اکھتے پھنہ سہ گنہ تہ قسمک رنگ و بو، مز تہ لطافت پیہ کاٹھہ نشہ
حاصل کران بلکہ سید سیو دق تعالیٰ ہس گن رجوع کرتھہ ییم ز او جار پراوان۔
پرتھ و ز چھ تہ بندس بدن اند را کھ نو و تہ سرتاز روح گتھ کران۔ ہر و ز چھ تہس اکھ
نورانی عکس در پٹھگی یوان تہ تہسز شانہ چھے و و گنان۔ سہ چھ اطرافن تہ جہاتن
ہند و زولانویران تم حد پار کران، طرفاتن تہ جہون ہندو ٹھری پھٹھران تہ رب
الارباب، رب الاطراف تہ رب الجہاتس تہ تہسز بارگاہہ گن پرواز کران۔ سہ
چھ پن پان فدا کران، زالاں سہ تہ شمکوکو پاٹھگی تہ اد چھ سیر اسرارن ہند مس
چوان تہ دید مان چھس دیدار میلان:

بیداد دُر دوانہ اسرار گئے مس چوکھ

دیدار چھکھ دید مانہ کمیؤ کانہ دُر تھ پیوکھ

سہ چھ ظاہری طور مران تکیا ز حضرت شارع علیہ الصلوٰۃ والسلام لتسلیم سہن

شریعت، مرگ یعنی موت، برزخ، میزان، حشر بیتر چھ برحق تہ قانون قدرت
چھ کُل نفس ذائقۃ الموت تھ گس کر انکار۔ کرتہ ہے کائہہ ماٹن چھٹہ
روا۔ ہتھ کئی یاں زیتھ کئی پوز طرفاتن تہ جہون ہند زولانہ نیشہ مکتی تہ نجات
پزاون وول زیند دل، تہ عشفہ زولانہ ناکر تزاؤ ورمز آسان چھتس چھ یہ مقام
عطا سپر مت آسان زمرگ تہ حشر چھ تیشز وتہ اند روتہ ٹھری بنان۔ پوزتس چھ
یم معمولی تہ ہیج باسان۔ یم کیاہ کرنس؟ تکیا زتسند ساز و سامان چھ صرف تب تہ
تاب، یس تس پیہم پاٹھر سوز دوام عطا کران چھ۔ سہ چھ اتھ پینہ والہ نپلہ
آسانہ تہ تھو ساسہ وادو آسانو ہیور نورستانس تہ نور کین نور خان مثر پرواز
گرتھ پن تن من غوطہ وان، ادمہ مثر نیر تھ پینہ ا کس نور فضا ہس مثر زحت سفر
گنڈتھ پرواز کران تہ اد قوت بے بہا حاصل کران، تس چھ رنڈ، پابند، زیند دل
بند و نان۔ سہ چھ عشق الہی یک طلبگار آسان تہ سہ عشق چھتس بدس یوان تہ
پوز زندگی قدم بہ قدم رفیق، ہمد تہ ہم نشیں بنان:

دایم چھ آسان زیند دن سپر حق للہ و ن
قایم چھ تمن عشق خدا بی چھ مدعا مینون



شاہد دلنوی

شیر علی مشغول

کاشر شاعری ہند پاسہ فنکار

حضرت علی علیہ السلام سُنَدِ قول چھ زِ زیندِ زُو ورتاؤ و لکن ستر تیتھ خلوص تہ سو
شفقت زینیلہ تہو یہ دُنیا تر اوتھ گروہوتہ تم و دن تیتھ کنڑ تہندس یادس منز زن تہ
کاٹھہ عزیز روومت آسکھ۔ حضرت علی علیہ السلام سُنَدِ یہ قول کوتاہ مآرک مؤندتہ
معنہ سووچھ، اگرے تھ سنوتہ دنیا ہس اندر ورتاؤنہ کاٹھہ کاشہ ستر بدی تہ حسد۔
دُنیا ہس اندر چھ سبٹھاہ کم لکھ تم بین پٹھ یہ قول صادق چھ یوان۔ ننتے وچھوتہ
دُرس عالمس اندر چھ بدی، حسد تہ کہین سہ نال وؤلمت زامہ تلہ چھنہ موکلن
پاے۔

ادبی برادری اندر تہ چھ پتھ و تھ ادہن تہ شاعرن ہند یہ منفی و طیر و چھنہ
آمت ز تم چھنہ اکھ ا کس نسبت خلوص تہ شفقت ورتاوان۔ اگر نہ تہ آسہ ہے
تیلہ آسہ ہے اکھ ادیب ضرور دؤیمس ادیب یا شاعر سُنَدِ تخلیق پرتھ یا ستر تھ پنہ
دلچسپی ہند اظہار کتھن کلامس اندر کران یا پنہ نقد و نظر ک ہدیہ پیش کران۔ یہ منفی
رجان چھ کاشر شاعری اندر ہنا زیادے بہن و چھنہ آمت۔ چنانچہ یس شخصس

شعر تھرن تگان چھ سہ دپان میانی کنز چھ دُنیا، بائے تمہ سُنڈ سہ شعر فنجی کہوچہ
 پٹھ پاسہ نیر کتن یا متہ نیر کتن۔ شاعری منزے یوت نہ بلکہ ادبچ کاٹھہ تہ
 صنف پاناون واکر سُنڈ چھ یو ہے و طیر۔ ممکن چھ یہ حال آسہ دُنیا ہس اندر کاٹھہ
 تہ زبان ورتاون والین ہند مگر کاشرس ادبس اندر چھ امیگ پوتر گوبے پہن۔
 کاشر زبانی ہند مکتی بہلہ پایہ تہ بلند قامت شاعر رُودری امی سببہ تمام وائسہ
 پردن ژھالیہ یا آء کس منصوبہ بند طریقس پٹھ نظر انداز کرنہ تاکہ منظور نظر
 ہند مول گوہنہ گنہ طریقہ کم۔

وئی کین یس گہنہ مشق، بلند مرتبت تہ بسیار نوپس شاعر ستر یہ کتھ
 کران چھس سہ چھنہ گنہ تعارف محتاج۔ تس چھ ادبی دُنیا ہس اندر نہ صرف
 پرتھ ادیب تہ شاعر، تہذیب تہ ثقافت شناس رتی پاٹھی زانان بلکہ چھس
 شاعری اندر پنڈی اکھ خاص پز زنتھ تہ وقار۔ خواجہ شیر علی مشغول چھ کاشر شاعری
 بالخصوص نظمہ شاعری ہنز اکھ رژ علامت تہ شناخت پتھ ہتی موالہ پہلہ شیو ڈھولو
 پٹھ پن سکہ جماتھ۔ افس متعلق یو دے اہندو، معصوتہ ناقد و بجل چھنہ
 ورتوومت بلکہ امی ستر شاعری تہ فنس متعلق چھکھ بے پھز وک پاٹھی پنڈی راے
 ڈرہو بین اندر کاشر ہندو بارستہ ادیب، دانشور تہ زبان ساز تہ ثقافت شناس
 شاعری چھ۔ مثالہ پاٹھی محمد امین کامل، غلام نبی فراق، حامدی کاشمیری، محمد یوسف
 ٹینگ، نشاط انصاری تہ قاضی ہلال دنوی تہ تہ بلکہ بشیر کوثر سندا کھ تنقیدی مضمون تہ
 چھ را قس نظر گوومت یس سبٹھاہ و اشرا و تھ تہ تفصیلاً رقم کرنہ اُمت ز شاعر

سہزن تمام تر تخلیقی صلاحیتوں چھ گائیکوں کا۔ بیس صاحب پھندے ہیر کنہ ذکر
 کو رچھ گائیکوں کو تم تھو ٹو گتہ گائیکوں منار بیو جدید گائیکوں پھانٹھلاونس تہ
 گائیکوں زبانی ہنرترتی تہ ترو بکس اندر تھکنڈ لایق کارنامہ انجام چھ دی متری۔ تہ گرتھ
 تہ گو ٹھنہ سلسلہ یعنی پٹھ بند گھون۔ وگہ پٹھ ووزیہ آپہ دریا وگو ٹھنہ
 اتی منجد گھون بلکہ گو ٹھانچہ روانی تہ امہ کس آبس اندر مزید اضافہ گھون مگر
 تہ چھنہ سپد مت۔ وجہ؟ بیس کنہ بیان گری۔ خواجہ شیر علی مشغولن پیواہ
 خدمت گائیکوں شاعری ہنرترتی تام گرتہ وونہ تہ چھ کران سو چھے کائسہ تہ نظر
 بازس شانہ و وگنا و نہ با پتھ کافی۔ پیواہ کام اگر یورپکو کائسہ شاعران یا ادیبان
 گرتھو آسہ ہے تس آسہ ہن گویا نوبل پرائز (Noble Prize) تفویض
 گری متری۔ مگر آسہ گائیکوں چھ پتھ و تھ پردار کر۔ اسہ اگرے پن حق، ہمسایہ، یا
 رشتہ دار تھو دپہن عہدہ پزادوان چھ، سہ چھ موقع ملتھ اسہ چوب دوان تہ بے
 عزت کران۔

بہر کیف خواجہ شیر علی مشغول چھ گائیکوں شاعری ہند اکھ خوش بیان، خوش ادا
 تہ رنگین بیان شاعر، تیسس پنز ساہے وائس گائیکوں شاعری ہند زلف تہ خال
 شیران تہ پاران ووت۔ اگری ماجہ ہند گو برن چھنہ گنہ تہ کالجس یا یونیورسٹی
 اندر پورمت لیو کھمت تہ نہ کائسہ مروجہ تعلیم حاصل گرتھو، اما تربیت چھن تھ
 پراومو زاعلی کھوتہ اعلیٰ تعلیم یافتہ واتیس نہ پاد چھلنس تہ۔ یہ چھ مادر زاد
 شاعر۔ چنانچہ شاعری خاطر چھنہ نصابی تعلیم ہنرترتی پوان تکیا زیہ چھ

دیہ دہیت لگی میوٹھ۔ خواجہ مشغولس چھپے یہ گاشہ زہر تو رے ستر اُسہو۔ حافظ چھس
تیو تاہ تیز زہتہ بزرگی اندر تہ چھس اردو تہ فارسی زبانی ہند کی واریاہ شعر از بر۔
بالخصوص چھپے فارسی مخرجن تہ کئی واقف زن تہ چھپے اُمی سبز مادری زبان
پہلوی۔ دراصل چھپے یہ تمہ خانہ وادک اثر تہ منز مشغولن زائسن چھپے لو بمت۔ یہ
چھپے سہ خانوادہ یس کا شہر زبانی ہنز پتہ و تھ خدمت کران چھپے آمت بلکہ چھپے بشمول
خواجہ مشغول اُمی خانوادن کا شہر زبانی کینہہ رتی شاعر تہ ودیعت گری تہ۔

خواجہ مشغولن چھپے و نیگ تام ز شعر مجموعہ ”رقص گرداب“ تہ ”ہی دسوان“
ناؤ کا شہرین ادبی حلقن و نہ آمت تہ اہنز شاعری ہند نا گرا چھپے و نہ تہ تاز دم شوقہ
والین ہنز تزلش ہو مرادان۔ مشغولس یو دوے شاعری ہند ہن تمام اصنافن
پٹھ پٹن موقلم چلاؤن نگان چھپے مگر بیو دہیت و نیگ تام نظم تہ غزل صنفن کن ژور
ژور توجہ تہ بیم دو شوے صنفہ ورتا ویکہ تمہ طریقہ ز اتھ پٹھ یہ فخر کرنہ۔ یہ ہند
انداز بیان یو دوے سیو دساد تہ کلاسیکی رنگ تہ چھپے مگر تمینگ مطلب گو و نہ ز
یمن چھپے شاعرانہ اظہار ورتا و نہ خاطر کا نسہ گزرے متس شاعر سندن مرہون منت
روژن پہوان۔ نہ، یمن چھپے پٹن ڈکشن تہ پٹن منفرد اسلوب ڈکھس۔ بقول مخمور
سعیدی۔

پاؤں لفظوں کے زمیں پر نہیں تنکنے پاتے

تندی سیل معانی میں بہا جاتا ہوں

یہ دورس منز خواجہ مشغولن شاعری ہند ابتدا کور، تھ دورس منز اُس لکھ

ترقی پسندی ہندس چکے چاوس لٹھ ڈتھ جدیدیت کس رجحانس ز آلوان نظر
گروہان۔ اگر یہ نوز شاعر اسی روایت ڈ لٹھ وجودیتس متری پنن رشتہ اُستوار کرن
پوان تہ بے جا گروہ نہ۔ چنانچہ وجود، فرار، تنہائی تہ بے نوازی ہوئی عوامل اُسی
شاعری ہندی خاص موضوع بنان، نیمہ متری شاعری سپاٹ بنے مو اُس۔ شاعران
نہ اوس قاری ہنز دلچسپی ہند خیال تہ نہ اُسی تم پنہ شاعرانہ اظہار چ کھلہ پاٹھگر
ترسیل یرشہان۔ تمن اگر زیر نظر کینہہ اوس تہ سہ اوس تمن تهنز پنہ ذ اُز ہند عرفان
یا عرفان ذاتنگ تکمیل۔ غرض تھ دورس منز اُس زندگی مختلف تجربہ منزی گزران تہ
نوی نوی ڈھل تہ ول تلاش کرتھ اُسی شاعر پنہ آسنگ باس دینچ کوشش کران۔
خواجہ مشغول تہ چھ یہ سورے تماشہ ڈ چھان۔ امہ کبن اصل تہ خراب پہلوون
اُزی منزی گروہان مگر پنن اعتدال رچھتھ تہ روايتکو مثبت عناصر قبول کرتھ تہ پتہ
اد جدید نظریات نظر تل تھ اوتھ اکہ نو اسلوب تکمیل کران۔ یہ نو واسلوب چھ
پرا اُس تہ فرسودہ خیالس پھیش تھ تہ تمہ کالجہ افراتفری نشہ پنن دامانہ بچاوتھ اکہ
نوز مانچ آواز بٹھ پرن و اُس تام واتان تہ تس اکہ رتہ تہ سادروار پاک پا کیز
ماحولچ بشارت دوان۔ چنانچہ مشغول عن نظممن اندر اُس ماحول تہ بیم منظر اُسی
ڈ چھان یا محسوس کران چھ سہ چھ دس ویہ ون تہ اُچھن خیر کرؤن۔ اہنز شاعری
ہند بن موضوعاتن سلتھ تہ سام بہتھ چھ یہ کتھ شبقہ پاٹھگر واشگاف سپدان زاتھ
اندر چھ بے انتہا لول (محبت) یار سُنڈ دُور بر، وچ آس، بے وفائی ہند شکو تہ
یادن تہ خواہن ہند اکہ نہ سوہ ون سلسلہ۔ اتھ متری متری چھ اہنز شاعری اندر

غزلِ گمگینِ فضا تیرے پیرے ان مگر سوچکے غصرتیرے تجسس یس نو انمانہ تیرے نو اندازک
چھٹے چھٹے ہنزن غزلن اکھ انفر ا دیت عطا کران

غم دلک خالی چھٹے جانی یار مینون
دود جگرک مونس و غم خوار میو
روومت چھٹس کوٹہہ دیم وونی اشتہار
کوٹہہ مے ژھانڈیم کاٹہہ نہ دعویٰ دارمینون



پانس کرو غم چھٹکھ ژھاران
راحت پیہم چھٹکھ ژھاران
طوفانن بستین تھاو ہال
بڑدلیہ شبنم چھٹکھ ژھاران



مملکت چھٹس، شاہ چھٹس، پانے پٹن رعیت پہ چھٹس
چھٹم نہ لشکر ڈیڈی واناہ پاسبانا چھٹم نہ کاٹہہ



دماہ روزان یارو شادمانی
کے آسان گلن ہنژ زندگانی
مے نو زائہہ گئے کنن آواز بلبلی

فقط گر راتہ موعلو نوحہ خوانی



یارو ہشت پہر گڑھ آسزی دردل دزونی عشقنزی ریہہ
پانہ چھوزانان کیاہ گڑھ حاصل نارے تراون آبس منز



سُنی تو شعرس۔ شاعرن چھے عشقہ نارچ کتھ کر مو یوس غمک استعارہ بٹھ
اتھ لافانی خیال بناوان چھ مگر اتھ غمس ستر یس خوشی ہند احساس و تلاون چھ
سہ چھ و چھن لایق تہ تہ منس و بون لایق تہ۔ خوابن تہ یادن چھے مشغول تہ
شاعری اندراکھ خاص اہمیت۔ وچھ تو ییم کینہہ شعر مثالہ۔

چھس تصور منز تہس تہتین چواں وصلک شراب
خوفتہ گو مت شوق چھم دوبارہ و زناون چوان
چھس بہ لاوارث اگر رووس تہ کوئہہ ڈھارتھ انم
منز چندس پانس پنن تصویر چھم تھاؤن چوان



اگر خط استوا پٹھ نے یہکھ قطب شمالس کن
وچھس منز لول ماشٹھ ہے مے نے پننہ بخت ڈلہ ہے



چھم تصور چون و زناوان شوق

چھم ووتھان ریہہ لولہ نارس چاڑی دڑے



گامہ دُشیز و پنیہ گنگراوڑی پتڑ لکھہ ہاتھ
قافہ چو پڑی یو بستی پٹھی زن کور پرواز



مگر امیگ مطلب گوونہ ز خواجہ مشغول نہ شاعری ہندی موضوع چھ
محدود یا خالص رومانیت بلکہ چھ ہندی موضوع تہ رنگا رنگ تہ یمن اندر چھ
مناسب تنوع نظر گروہان۔ (خواب چھ انسان سخت ترین حالات اندر تہ و چھان
تہ سو کھ ساویہ ہندی بن ژہن اندر تہ)۔ رومانیتکس غلاف و لتھ چھ مشغول
موجود حالات پٹھ اکھ سنجید طنز کران ونہ یوان۔

خواب مشغول چھ محتاط انسانی رُوین ہندی شاعر۔ اہنزن غزلیہ شعرن اندر
چھ اہنز و شاعرانہ شخصیت پر تو در پٹھی یوان۔ یم چھ پڑتھ ساتھ طرحداری
ہندی قابل رُودر مٹر۔ یمن چھ کتھ و تنگ یا پتڑ کتھ بوزکس تام و اتناونگ یا فکر
تارنگ پن اسلوب تہ اسٹائل۔ یم چھنہ کم از کم مے زانہہ تہ بے اسلوب گفتگو
کران نظر گائتر۔ حالانکہ یہ تہ چھ پنہ جلیہ پزر ز یم چھ پڑتھ و اُنسہ ہندی
فردس مٹر دل مو رتھ کتھ کران، چاٹھ ژٹان، ٹھٹھ مسخری کران، ٹھاہ ٹھاہ کران
اسان مگر زانہہ چھنہ یہ و چھنہ اُمّت ز کانہہ کتھ کیاہ آسہ اخلاقی دایرہ نمبر یا او ہندی
لب و لہجہ کیاہ آسہ باڈر۔ مے چھنہ یمہ کتھ ہنر حیرت زیوت ٹھٹھ مسخری کران

وول شاعر کتھ کنڑ چھ پنہ شاعری منز پہر سنجیدگی تہ متانت ورتاوان۔ یہ چھ تیتھ مزاح نگار ز اہنز کتھ بؤ زتھ چھ اسی اسی کاہن سؤر گھوہان تہ انسان چھ دپان زیاد کھوتہ زیاد و قنس روز ہوا ہند ہے صحبتس اندر زندگی ہند غم کا سان تہ شادمانی نالہ مؤت کران۔

کاشر نظمہ شاعری اندر چھ خواجہ مشغولس پٹن آہنگ تہ اسلوب یس قریب قریب و نہ کاٹسہ ڈو یس شاعر س باگہ چھنہ اُمت۔ ورگہ پاٹھی ہبکو و تھ زیم چھ پابند تہ مقفح نظم لکھنس اندر اُستاد سُنڈ درجہ تھاوان۔ حالانکہ کاشر شاعری اندر یس تہ شاعر غزل لکھنس اندر پد طولی تھاوان چھ سہ چھ نظم یاد ویم کاٹھہ شعر صنف ورتاوس اندر تہ زور آزمائی کران۔ اتھ حدس تام زیتیلہ کاٹسہ پنڑ کاٹھہ شعر سومرن ترتیب دنی آسہ تمیگ نصف کھوتہ زیاد حصہ چھ نظمیں پٹھے مشتمل آسان تہ تم تہ غیر مقفح، فری ورس یا بلینک ورس فارمہ منز، یمن گاہے گاہے معنہ ژھاران ژھاران پران وول تارز و کنڑ کرکستان واتان چھ۔ پؤ زخواجہ مشغولس چھ قدرتن سہ پد بیضا عطا کو رمت زیم تھ موضوعس تھہ دن لفظ تہ خیال چھکھ اردس پکان۔ کاشر شاعری اندر نظمہ ہند عہد بہ عہد ارتقائی جائز ہنہ پتہ چھ امہ کس ہتیس تہ فارمس اندر سپدن واجہن تبدیلین ہندس تنو طرس منز مختلف دور گندہ یوان، مثالہ پاٹھی گوڈنیگ دور تھ اندر عبدالاحد آزاد تہ بھورٹی نظم نگاری چھ یوان تھ اسی نظمہ ہند قدیم کال تہ و تھ ہبکو تہ یہ وق چھ کم و بیش پنڈت دینا ناتھ نادمس پٹھ اند واتان۔ امہ پتہ چھ شاعری ہنز اتھ صنفہ

اندر سہلاب صورت اضافہ سپدان، چنانچہ راہی، کامل، فراق، فاضل کاشمیری ہودی بڈی بڈی تہ ناودار شاعر چھ نظم صنف ہند حوالہ قلمس کش کڈان تہ کینہہ ٹوڑی ہیتی تجربہ گرتھ نظم ہندی زلف تہ خال نوسر پاران تہ اکھ ضخیم سرمایہ چھ امہ رنگو جمع گوہان۔ یہ چھ نظم ہند دویمہ دور کہ ناو پتر مہ صدی ہندس ستمس دوسرے اندر وار وار اندر واتان۔

نظم ہند موجود دور چھ پتر مہ صدی ہند امی ستمہ دوسرے یورگن برابر چلہ ون تہ ہتہ واد شاعر چھ اتھ صنف متری گوتھتھ مواد تہ موضوع رنگو تبدیلیہ اتھ پنڈی زور ہاوان تہ کینون دانشورن تہ نقادن ہند ون چھ ز نظم ہندس موجود کالے اندر آے اتھ اندر شعوری تجربہ گرتھ امہ کس ساخت تہ فارس منز خاطر خواہ تبدیلی اتھ یہ زیاد دلکش تہ وہی وڈی ادبی صنف بناؤن گن پرنہ پاٹھی توجہ دینہ۔

خواجہ مشغولس پٹھ چھایین نظم ہند ہن ہیتی تہ فارسی تجربن ہند اثر لینہ یوان کنہ نہ۔ سہ چھ الگ موضوع مگر نظم ہنز یوسہ ہیت یین باگہ چھ آمو سوچھ داراہ دلفریب تہ تہ دنوا تہ۔ یہ ہنز نظم ”گرپسی کور“ چھ بنہ گنہ تہ صورتس اندر ہجورنہ ”گرپسی کور“ نظم نشہ کم پایہ کینہہ۔ وچھ تو نظم ہندی ہم ز بند۔

روپہ گوڈن تامت ژنہ چھ زلف دوتا
چھ نظر یون گن تہ زیور چھ حیا
ساز کورمت چھ ژنہ دست قدرت

گریسی کوری چھی ہران گوسم کتھن



دانہ روستے قد ڈٹے الفچہ آچہ چھے
سر وگل چھبکھ کیٹھہ حُسن یوت ژہالیہ چھے
جانِ شاعر پاری پاری چامن وتن
گریسی کوری چھی ہران گوسم کتھن

یہ ہنرِ نظم چھے آبشارِ کرا پائٹھی گرزان، ساز وایان تہ ددِ متین دِن شہلہتھ
دوان۔ چنانچہ کملو سُنڈ نغمہ، فصلہ ہیل، تارکھن ب، علم، قلم، ووزل، شمع، محنت کش،
خود روپوش، دستِ فطرت، شاعر، معشوق سُنڈ شکر یہ، ہر د، زوالِ حُسن، آب تہ
عالم وجدان بیتِ نظم چھے بہترین قلم پارہیوستی کا شہرِ نظم شاعری ہنرِ شان ہران
چھے۔ اہنرِ کیشہ نظم پڑتھ چھہ باسان زیم چھہ علامہ اقبال سُنڈ شاعری سبٹھاہ
متاثر کرے تہ تہ توے چھہ ہنرِ واریا ہن نظم اندر اقبال سُنڈ اسلوبچہ پڑوتہ
پڑنگہ نظر گرہان تہ سے تفکر تہ آہنگ چھہ محسوس سپدان یس علامہ سُنڈ شاعری
ہند خاصہ چھے۔

وچھوے تہ یہ ہنرِ غزلیہ تہ نظم شاعری ہند مول تہ مو چھہ فقط لول مگر یہ
لول چھہ ہنرِ شاعری اندر پھٹھ پھٹھ نیران۔ یہ ہند یہ رومان چھہ کنہ ادبی تحریک
یا کانسہ ہند کنہ اثر و نفوذ کنہ بلکہ یہ چھہ ماجہ زیو ہند گلو میٹھ یس از طرف
قدرت کانسہ ودیعت سپدان چھہ۔ ورگہ پائٹھی ہکبو وبتھ ز رومانیت چھے بذات

خود اکھ تحریک یوسہ کلاسیکیتس خلاف اکہ ردِ عملگ ناوچھ۔ ونہ چھ پوان زامہ
 تحریک چہ خصوصو چھے مغربی ادبیاتس بالخصوص جرمنی، فرانس تہ انگریزی ادب
 اندر مشتتر کہ۔ مثالہ پاٹھی انفرادیت، جذباتیت، فطرت پرستی، انسان دوستی یا
 بیزاری تہ قنوطیت بیتر۔ خواجہ مشغول نس کلامس اندر چھ بیم ساری عناصر بدرجہ
 اتم موجود۔ کینہہ مثالہ۔

چھا ڈیکو گلہار بیم کنہ چانی گل روخسار چھا
 چھے بٹھس پٹھ کا کل خم دار کنہ شہمار چھا
 زو کلان چھم چھس دپان چانس کلامس کیناہ ونو
 چھاپہ مشغول نظم کنہ غزلہ ہندی اشعار چھا

(.....جذباتیت)

دستِ فطرت کھالہ ہے نے آفتاب
 نور کتہ تلمہ ہے نظارن تھوود نقاب
 بخشہ ہے صدس تہ کاٹھہ نیسان پھیور
 نیرہ ہے دردانہ کتہ با آب و تاب

(.....فطرت پرستی)

چھکن گل وں خوشبوئے گمس کروڑوپاری
 غزل گھنڈ باپت گون جانہ وار
 وں زرگر کرن کتھ سا کرو زرگری

کرن ۽ ڪهنڊ بابت وڻ زيور تيار

(.....پيز آري)

بناو ڪياڙِ دُنيا تڪرِ اولاه
 ۽ چها جاني زهر ماڻجھس رلاو
 زمين اسه سارن ۽ ٻنڙ ماڳ ميراث
 ڪنھو پڙھ خون اکھ اُڪر سُنڊ بهاوو

(.....انسان دوستي)

عارضی ھا چھ ۽ ۽ ڇڏن ھنڊ ڄمار
 چھ حسن ديوتمت مشيرھ مستعار
 توش ما پڪھ ھ ۽ ۽ ھا سورے ني
 بيٺلھ پڙي تيٺلھ جان اتھ صورت بني

(.....قنويت)

خواجھ مشغولن چھ پنھن ھا عري مٺر جايه جايه انسان سٺر آزادي ته فرد سٺر
 جذباتي اوسوڱي ٻنڙ وڪالت ڪر ٻو - ۽ ۽ ڇھ ھا عري اڪه سماجي ذمہ داري ٻنڙ
 عملہ رنگو اتھ حدس تام سمجھان ز ھا عري مٺر گوھ انسان سٺر ۽ آزادي ته ذھني
 اوسوڱي برقرار روزني - اھنڙ ھا عري ھنڊ سفر چھ دراصل اھنڊ تصور انسانيت
 سفر..... خداوند ڪريم تھ اونس روبه صحت ته واري اھس ڪالس تام پوئشن ڪاشر
 زباني ته ڪاشر ھا عري اھنڙ آش -

☆☆☆

پروفیسر محمد زمان آزرده

بیون گر

کاشرس سما جس منز چھ مشہور ”بیون گرس لنگوڈی کرس..... پیکہ وٹہ گرس بہ
 کیاہ کرس“۔ بز وٹہہ کالہ تہ اُس گبر تہ نوشہ بیون گر کران، اما عموماً مول مر تھ۔
 تپتس کالس مول موج زیند آسہ ہا، تپتس کالس اُس زیاڈتر پیکہ وٹہ گرس منزے
 روزان۔ اٹھ اُس واریاہ فاپڈ۔ اما نوشہ اوس باسان ز بہ چھس قادخانس منز۔ تمس
 اوس نہ یہ کہیں باسان ز کور سندر شری اُس پانی پائے رچھنہ بہ ان۔ کس شرس کر
 ج بچھ..... کر کھو تکر بتہ..... کر پو تکر سبق..... تہ کر دزاو باقی شرن ستر
 گندہ..... نس اوس صرف پنہ آزا دی ہند غم ز ہنس، ہیو ہر جھم پٹھ زن تہ تھانہ
 دار۔ دوہس تھادان پٹھ سؤ میر تھ تہ شامس ییلہ خانداریس تہ اٹھ پٹھ تزاوان
 گنڈیلہ تہ اومتہ بوزر تو.....!

عام لوکن چھ بل چک ز مرد چھ آسان دور، مضبوط تہ طاقنور۔ اما یہ چھ
 سورے اپڑے۔ آسان ہے چھ پہلوان، اما پنہ زنہ کیاہ کاٹسہ تہ زنہ نش چھس
 کوہ کر گروہان۔ یہ چھے بلو کتھ ز زنانہ چھے مردس ستر ژلان۔ ژکہہ چھے تمس
 پائے ژلہ راوان، اما پانس ستر، پینس ستر نہ۔

تھو گروہو گبر دفترس منز تہ بہو دوہس کھنڈس، پائے تر و فکر ز زمین ہند ٹیل
 چھامرد صاف کران کہہ مردن ہنز فایلہ چھے زنہ ڈسپوز کران۔ دور مہ گروہو.....

کنہہ و زگرہو یونیورسٹی یا گنہہ کالجس منز۔ آتہ و جھو کلاسہ نہر سٹوڈنٹ بہتھ
 لڑکہ کنو کور۔ آتہ و جھو کور آسان بہتھ اسان تہ گنڈان، اما لڑکہ پچاری اکھ
 آسان گڑھتھ چاہہ باپتھ آرڈر کران، بنا کھ سموسہ بہتھ پکان، بنا کھ کتابہ بز وٹہہ
 کنہہ رٹھ نوٹس بناؤدو بناؤدو بھین دوان۔ پتو بیلہ ہل دنی آسہ، تمہ ساتہ آسان
 کورن پڑس مٹھتھ گومت تہ لڑکہ پنن کاڈ بہتھ بز وٹھ بز وٹھ نیران۔

وچھ تو از بیلہ کور خاندن کران چھ، اُمس چھ مانو بیون نیرنگ سامانہ ستر
 دوان۔ ہمش ونان اُکر ہے اُکر ہے

”مانو ہے چھس فرج، واشنگ مشین، بڈ، ڈوچہ تاوتہ کھنہہ بانہ کنورن
 بانہ ستر دنی ستر گیس چولہ تہ گیس سلنڈر تام“۔

ہمشہ چھہ پتاہ زیہ سورے چھ سز و دیکس گرس رکیت، اما سو ماچھہ کتھ۔ تس
 پچاری چھنہہ پتہ پئے زیہ چھ سامانہ تس نش تسند گو بر الگ کرنگ۔ تس چھہ یہ تمہ دوہ
 فکر تران بیلہ آب سُر پٹھو گومت آسان چھ۔

وڈی وچھ تو یوسہ نوش پینس شرس تھادو تھادو ونان چھہ ”زگرہہ نانی دینی،
 بڈی بَب تراوی سکول تھہ“ تہ بیہہ باقے تہ۔ سوے چھہ بیون نیرتھ پینس شرس
 یٹھ سبق پرناوان زرن تہ نانی بڈی بب دو پر چھہ آسان۔ یوسہ سُر دس گرس منز
 کالہ تہ پگاہ دود لاگان چھہ۔ پرتھ ہفتہ بیون بیون ڈاکٹرن تہ حکیمن گروہان چھہ
 تہ بہمار آسنگ بہانہ گرتھ مانین گروہان چھہ۔ سوچھہ بیون نیرتھ ہنگہ تہ منگہ اُرتہ
 ڈر گروہان۔ نہ دود تہ نہ دگ۔ صُجس نکہ نکہ گاشہ و تھتھ گر پچ ساہے کام

کران۔ خاندارس دقتس پٹھ پڑتھ چیز و اتناوان۔ وئی گو و اتھ ستر ستر تمس
یوت اورتہ تھادان زتس مچھنہ وونی ما لس یا ماجہ، پینہ یا باین کنہ رگہ سنہ نس
موقے میلان۔ ماڈی تو گو ڈیم گر کر باڈا س، تھے چھ وونی بس از ائی باسان۔ وار
وار چھ یہ دؤ ربتیوت گروھان ز انسان ہیکہ نہ و تھتہ کا نسہ۔

بز وٹھ اُس نوش کؤ رگرے آسان، ہر گاہ کر ہاتہ کا نہہ کام تہ سو اُس گر پٹھے
یوان کرنہ۔ وونی چھنے گو ڈ ہش تہ تہ مہر از سٹد مول تہ ژھانڈان ز نوش گروھ آسنی
ملا زم۔ بز وٹھ کالہ آسہ ہاتہ نوش ملا زم تہ یو ڈ بڈ پم ماشٹرباے آسہ ہا۔ سکؤل تہ
اُس پڑتھ مجلس منز آسان۔ او کنی اوس نہ اُمس گر دؤ رتہ پوان روزن، اما وونی
چھنے نوشہ اکثر بز تھانڈ کھوتہ تھن نو کری آسان۔ سو چھنے ڈی تو ایگز کیٹیو، یعنی آفیسر
آسان۔ اُمس چھ عادت آسان حکم و نس نہ ز حکم مانہ نس۔ و نچ چھنہ ضرورت۔
پائے سو نچو تھن گرن ہٹد حال کیاہ آسہ سپدان۔

پیارڈ چھ پتہ پز ریز وٹھ اوس اکھ نفر زینان تہ داہ اُس کھوان۔ وونی چھ
سہ وق تہ ز ساری تہ ہر گاہ زمین توتہ چھنہ برابری یوان۔ پٹھ چھ ساری اکھ
اُکس ژر نظر و چھان۔ زنتہ ساری پٹن نہ کا نہہ، او کیاہ اکھ اُکھ سٹد کھوان،
خاند ر کہ دوہ کیاہ، بلکہ خاند ر بز ونہہ یتھ کن لو گمت آسان چھ، تی چھ سپدان۔
نوش چھنے دپان ز پہ کیاہ کر یتھ پکہ و پگرس۔ او بیون گر آسم تہ لنگوٹی کرس۔

پتہ چھنے تمس یہ پٹو لنگوٹی یاد پوان، بییلہ اُمس اکہ دوہ بز وٹھ پکتہ پٹنوش
بیون بیج لاگان چھنے۔

مکھن لال پنڈتا

کٹے ژور

عمہ بٹ اوس کٹے ژور، مگر بیلیہ ٹکر پنہ ناؤک اکھ ژور ریس سہ یزتہ سان
 عمہ چچو اوس ونان، وچھ پلسس ستر پھیران تھوران تہ تہندس ونس پٹھ تہند
 بدلہ ژورن تہ تفتیش کران تس گو وژ وژ کاش بہ تہ آسہ ہاتھو دژور، یمن ستر
 آسہ ہاتھ کڑو و تھان بیہان تہ ژورن شکلکھ کران۔ برادری تہ آسہ ہے مے تہ
 عمہ چچو پٹھ پٹھ یزتہ سان پیش بان۔ مگر تہوہ اہمیت اُس نہ وئہ تس اتھ کارس منز
 حاصل گہو۔ امہ خاطر اوس سہ اکثر سوئچان زہہ کیاہ کر تیتھہ پٹھ پلسس روز
 زیو پٹھ تہ تم آسن مے عمہ چچن، ہیو سلوک کران۔ اگر کائسہ غر پس پٹھ ہے
 یس تہند خاطر سہل اوس مگر تمہ ستر مانیر ہے سہ ناویس سہ ژھانڈان اوس۔ اگر
 برادری پے لگہ ہے سہ پھو غر پب گرس یس اکہ تہہ اکہ دوہ ضرور لگہ ہے، تم
 ژہن ہنس تھو کہ زٹ کہ چھ ژھوٹہ ژور۔ یو ڈ ناوچھ بڈ کام کرنہ ستر بنان۔
 سبٹھاہ دماغ لڑاوتھ آیہ تہندس دماغس منز سکیم زہہ دیہ کائسہ ناو دارس ایم
 دارس سن تہ تہہ کئی چہہ پلسہ چہہ نظر منز تہ کھسبس مرتبہ۔

گامس منز اوس مہشرا تھ تہمس گامہ برادری اُس مہہ کاک ونان بستھ تہ

ناودار۔ تم کو اوس اکھ دیوان خانہ آنگلنس مژر لبر بڑوٹھہ کنہ بنوومت تھ تلہ کنہ کہہ طرفہ بلاٹھ زین بیترتہ پیہ اندہ لگن اسی۔ پٹھ کنہ اوسس بلاڈ کمہ تھ ہتہ ژومپر آسہ و ہر تھہ اگر کاٹھہ سرکار ملایم کام پیہ ہے سہ اوس اتی قیام کران تہ بتہ میونڈ تہ مہہ کا کنہ کھوان۔ یئے یوت نہ بکو کہ اسی پلسہ واکر تہ اٹھ کمرس مژر و دس شہنس مژر ژورن تفتیش کران۔ دپان بخشس بو دچھے خدمتہ گار۔ مہہ کاک اوس گامس مژر بستھ تہ گاہے جار تہ اوسس نہ کاٹھہ گاہے۔ تئند دیوان خانہ اوس تیسز فراند لی تہ تیز فہم آسنس پیہ ہن تھر کھاران۔ اوے اوس تس ملایم زین ستر جان رسائی، ہیمنگ تس گلس پٹھ کینہہ تہ کینہہ فایدہ اوس میلان۔

از کو زعمن برادہ گروہ مہہ کاکس ژور تہ وچھہ گروہ برات نیر بس۔ اگر روٹ ہس یمن تر فکری بہ چھس نہ کٹھ ژور، تہ اگر نہ روٹ ہس سہ گورٹے رت۔ سور تے ٹلن آسہ بڈ سور بہ گروہ ٹلن۔ سہ کھوت مہہ کاک نس آنگلنس مژر ڈوئی گلس تیج اکھ لڈ اوس ڈالانس تانی گروہان۔ اتہ پٹھ دیہ ہے ڈالانس پٹھ ووتھ تہ تہ پٹھ اثر ہے آرام سان اندر۔ مگر مہہ کاک اوس وائسہ ہندس ستر مس دہلس منز تہ راج ہند راءس کم گروہ۔ ہپارو لوپہ نوو مہوتہ پشو لہذا اوس دارنش بہتہ نیمزم پاں شو شراے بوزان یس تئند پھوچہ تلو اوس وسان۔ ژوپارو اوس خاموشی تہ اندہ گٹھ، مگر تکی بوز ڈوئی گلہ پٹھ کہہ ہو چھ لہجہ بوسہ تس ویز اوس کرا پھ گرتھ و سٹھ تیج آواز، تہ سہ دزاودار کز وچھنہ کیاہ گو۔ اندہ گلس منز آس لہجہ پٹھ عمہ بوزنہ تہ مدے گنڈ تھ پز زوون یہ چھہ بونہ پورٹیک عمہ۔

عمہ روڈ پنڈو کنی منیٹ کرتھ دیو اُمس لہنہ بیمہ نہ۔ مہہ کاکس کھوت زیادے پہن
 شرارتھ تسند منیٹ کرتھ روزنس پٹھ۔ تھر دژنہ کزکھ بیتز البتہ اوس اتبھ بڑوٹہہ
 کنہ نارولہ تہ نے تہ پتھ کنی شرس لاینہ خاطر اسی زٹھی گوڈ نے ہاتھ روب
 کران پتھ کنی تچ تھر نے تہ دون اتھن منز بوئد فو پاٹھی رٹھ تہ عمس کن
 سپر کرتھ روڈ پھرس تس دار پٹھ ہاوان ز پتھ کنی دمہ ہاے گوڈ۔ عمہ تہ چھ
 اڈر کنی اسان تہ سوچان کس تڑھ چھ پڑ کچل ز کھو کھ بڑور ہاتھ چھ مے
 کھوڑ ناوان۔ پھرس روڈ عمہ وچھان امہ مزید کیاہ کر۔ چھیکرس ووتھ یون تہ
 ژول۔

دوہ تریبہ دوہو بیلہ مہہ کاکس عمہ نظر گو تھر او ان بلا وتھ، دوئس ہو کتھ
 ہو وئے۔ عمس اُس نہ وومیدے سہ بلا وئس سہ تہ کتھ ہو وئے و پتھ۔ تس
 ستو چشمہ رتھ لوگس نہ چار تس نشہ گھنس۔ مہہ کاکن پڑوئس، کیاہ چھکھ
 کرن؟

یہ سوال اوس نہ وومیدے مہہ کاک کیاہ پڑوئس۔ تھر وئس وٹھن گجار
 کرتھ، نسا کیاہ چھس کرن ژے سار سہ واقف چھکھ..... وونڈ گوئے
 گوٹھ ناکری تزن ژ چھکھ نے کن نے سپہ راوان، سہ کتہ گیو و بندوق
 پاد۔ یے گام چھ پیٹہ چھ نہ کانسہ سیو دشرا کہ تچ بندوق چھ نے کتھ۔

تہ ناوچھ نہ مے وئن، مہہ کاکن وئس۔ مے چھ وئن ٹھنڈن تہ ساعن
 پڑائبن اوس پانہ وائی سخ تخلص۔ حق پنس اوس تم ساڈی گپن رچھن تہ ہر د اوس

ژاکہ مانگے تہ دانہ چھو مہتھ اگنس دوگن طلب نون۔ مگر یوسہ وونی نو پینے
ووپدے یہ، بیمن پینہ اچھن کا ژ تمہر، گاش تھو ککھ، لجاظ ر ژھ رو ز کھنہ چشمن
مژ، بیمن مژ ژ تہ شامیل چھکھ۔ وونی اے ووتہ کیاہ ووتہ۔

ہسا کوسہ بلا یہ چھکھ۔ ژے بب چھکھ یہ خوش کری تہ ونتہ۔ نسائی لہ
مے کھسن آسہ ہے بہ کھسہ ہا کالہ کی پہر، ژے یو ز تھسا بہ یو تاہ کٹہ۔ بہ کھسہ ہا
ییلہ ژ کھز وکھ آسہ بکھ مارن..... بہ اوسس وچھن ژ چھکھا ہشار کتہ نہ۔
ژ ہبا چھکھ یوزے دین لایق۔

پز رچھ سے ون مے اوس وچھن ژ چھکھا ہشار۔
بہر چائی۔ ناو ژے اوسکھ آے کرن ڈالانس پٹھ ترنس، ژ کیاہ ون
مالایانی۔ زن مے فکری تو رنہ ژ کیاہ اوسے کرن، چائی کتہ چھائے وٹہر چھم
ژھنڑ مو۔ بہ اوسس ہشار لہزار وڈے ائد رم ائد رے۔
ژ یہ وکھ تہ میانہ تالہ پٹھ۔

بکواس مہ لاگ، یا مے وژنہ کڑکھ۔ یوتانی یون وسہ بکھ گلہ پٹھ تو تانی
آسہ بکھ ہقہ بل وومت مے گووے چانہ جو انی تہ گامن در آسنگ پاس۔ دبار
گرر زینہ پوھ غلطی، مے روزی نہ پز انہن ہئد تہ لجاظہ۔ تھانہ دار چھ یوریون بہ
کرتھ تہس حوالہ۔ بلا یہ گرہ کھ دفا۔

تھانہ دار لفظ گو و عمس بار گران۔ مہہ کاکن اوس تس کتہ شکلکھ کو رمت
وونی کتہ اےس تھانہ دار سٹز تمٹیل پھر نی۔ تکر مکر کھور مگر نیران نیران

وؤنس، سائتمہ ستر اگر ژ خوش گرهکھ چاڑی اتھہ کمرڑی، یہ وڑتھ دزاو کینٹوہا خوش تہ کینٹوہا پریشان ہیو۔

کینٹہہ دوہ گرهہتھ گپہ گامہ گوم سخ ہو ہرے ز تھاندار صائبس، یس تھانس نزدیکھے اوس اُ کس مکانس منز ڈیرس روزان، چھ ژور پھوڑمٹ تہ صند ووقہ منز پھس وردن ہتھ ژوڑمٹ۔ لکھ اُسی حاران ز تھانہ دار یسٹز کام لکن ر اُچھ کر پی چھے سپد پانہ شکار تہ سون حال کیاہ آسہ۔ ژور تہ گرهہ شداد اُسن تیمر تھاندار تہ تسٹز خاندار نی اُتی اُستھ سن دژتہ تمن گونہ کھرش تہ کنن۔ اُڈر اُسی ونان مزار میوہ آسہ ہکھ چھچھو۔

پلسہ واکر اُسی پانہ وانی مشور کران یہ کسٹد جراتھ ہیئہ اُستھ۔ تھانس منز بیئلہ اتھ اہم مسلسل پٹھ غور وخص لوگ ساروے ہند شک گو یکدم سرغنیہ عمہ چچس پٹھ۔ تھاندار صائبن وؤن مے چھے نہ یہ کتھ ہٹہ لون وسان سہ کر نہ یہوہ حماقت تہ پئن پان والہ ورگہ۔ تہ کر تھ چھ انسان تہ بڈکتھ چھے نہ کر ن ما گند نہ ہنا۔ توہو کر کی تو پنہ جلیہ کھون سہ کتہ چھ او سٹت امہ دوہہ۔ ساڈی نفر چھ تجربہ کار تم انس اول وانگن کڈتھ اگر نیت آسکھ۔ مگر دویمہ دوہہ صجائے بیئلہ عمہ چچہ تھانس پٹھ ووت تہ تھاندار صائبس وؤن، یہ کیاہ بوزنے یہ چھا پوز؟ تعجب چھ یہ زن چھ نیمیرم نفر او سٹت۔ ساری پلسہ واکر گپہ ہر شس تیکیا ز تمن اُس نہ وومیدے یہ پیہ اورے تھانس پٹھ تہ پتہ کر پنن تعجب تہ کڑی اظہار زن اُمس اتھ ستر کاٹھہ لین دین چھ نہ۔ مگر تمن اُس یہ تہ خبر یمن چھ باہ ہتھر

چندس آسان پیتنیں یٹھ ضرورت پیکھ تین تیتھ لاگن۔ پنہ مپگہ منز کو رتھو
 عمہ چچہ تہ شامیل زسہ کیاہ ونہ، کانہہ ژر ما ڈلس نیر تھہ تہ گنہ خاطر خواہ چچس
 پٹھ وانس مالگہ مدد۔ مگر کانہہ ہنزارے رلے یہ نہ اکھ اُکس ستر۔ یہ تہ چھ
 ممکن زپلسہ وُلُ ما اُسی عمدا چانگر کران یٹھ عمہ چچن معدہ وارپا ٹھو چھلنہ پیہ۔
 تہند شک اگر دُرگو نہ مگر اور یور تہ پتکھ مہنر لداونی۔ سارنہ ژورن ہندس
 طرہ بقہ کارس او پھیر دینہ تہ اتھ منز آو عمہ بٹن ناوتہ۔ اتھ پٹھ وؤن پلسہ والو یہ
 چھ مومو لی ژور اسند بتر چھ نہ تھاندارس بھرن۔ مگر عمہ چچن وؤن توہہ کیاہ
 حرج چھو اگر سہ تہ نگر اُنی تل تھایون، ژھوپ گا وگپہ گد اُمر کھاو۔ ساروے
 وؤن یہ یک زبان حرجہ چھ نہ کانہہ۔

نگر اُنی ہنر کام آہ اُکس تجر یہ کارپلسہ و اُلس یسند ناوجیالال اوس مہ
 تھونہ۔ تس متلق اُسی ساری پلسہ و اُل ونان ز یہ زانہ نہ ژورس روب کرن،
 ناسزا و ننگ چھ نہ سولے مگر کتھو ستر مو راوبس اُندر من گنڈ تہ نظر ستر عیس تل
 گرتھ۔ سہ اوس تون تنوخ تولی تولی کتھ کران۔ رخ ہنا بدلاوتھ یعنی کلس دج
 گنڈ تھ دزاو گرتہ عمہ نس گرس لوگ ژا کتھ کرنہ۔ مگر اتھ و قس ژا ونہ عمن گر
 کانہہ ووپریا گامک نفر، نہ گو عمہ گنہ نون۔ دون ترہن دوہن گو سہ ماشہ مارک
 مارک مگر اتھ دزاو نہ کانہہ خاطر خواہ نیچہ۔ عمن زانہ اُس گرگی کامہ تہ گاوستر آو
 تہ تس زن اُس نہ خیرے نہر کس آوتہ کس دزاو۔ نہر دزاوہ بیلہ گپن و چھن یا
 آہ نوٹ اوسس کولہ پٹھ ان۔ اگر عمن یہ کار آہہ ہے کو رمت تیلہ گوژھ

پھر ڈارس دار کوٹہ حسابہ سو لپا رک پینہ والین جس تھونی، تمن ڈر ڈر پی
 جیا لالس خبر اُس مگر تہ سپد نہ کینہہ۔ تسلا گروہتھ گوتھیکرس مجبورتس
 پڑ چنس 'ہمتہ بی عمہ کوت چھ گومت۔ مے اُس تس نشہ کامہ رٹھا۔ سوزانہ
 ہے تس ٹھپک پاٹھرتہ یہ تہ اُسس خبر یہ چھ پلسہ ول تہ اُس عمس چھے اٹھ
 شیدھک۔ دو پنس، سہ ہاؤ اوس رشتہ دارن نشہ دون دوہن ہند وعدہ گومت مگراز
 گیس ژوردوہ نوئے چھ نہ کنہ۔ زانہ خداوارے چھا، اکھتے چھ سخ فکر۔
 جیا لال سوٹچ یہ چھے سبق پرناؤتھ تہ تھ کڑی چھے ونان زن زون پینر
 زون زانہ نہ۔ ایشہ مطابق اُس تن پلس گوڈ عمہ لپتھ دین۔ زانہ مہنوس ستر
 کیاہ بحث لاگہ ہے، مگر زون مناسب نیرن۔ جیا لال نہ کلامہ تلہ نیو تمہ یکدم
 تلتھ ز کیاہ تانی پھنڈی چھے نژان تہ کتہ گو جیا لال عمس ژھاٹن ول۔ تمہ
 پڑ وٹس، اڈٹے کیاہ کری؟

بھنی اُس کامہ رٹھاٹے کیاہ وئے۔
 دیتھے پیہ یہ نس، تمہ وٹس۔

جیا لال دزاو واپس۔ تھانس پٹھ و اُتھ باؤن ساہے پچھ تھاندرس
 اکھتے وٹس خبر ژھپھ تھ مارو دمہ۔ تھاندرگو دون دون پھلین تھو دو تھتھ
 تہ عمہ نہ ناہ لوگ و اُہی تباہی ونہ۔ سورے تھانہ لوگ کنہ پھسراے
 کرنہ۔ وونی ہینون پچھ سون عمس گن پھیرنی۔ اکھ ز جوان پلسہ واکر آہ
 ہنجارو پاٹھرتہ موقعس سول پلون مژسوزنہ آیا عمز زانہ کیاہ بہتان چھے ونان،

کمس پینہ ہنڈ و اُرک و بیہیہ پتین دوہن چاہیہ بتہ موقعس آسہ پتھ بز و نہہ ضر و رگر
یوان۔ پیتے بے کار با ژ چھ گر کمن کھران، بیا کھ کربس پتین دوہن قہو۔ پلسہ
و اُرگہ بتہ موقعس مشکاؤ شکاپنہ۔ لرد و ر پٹھرا کس دوسہ ژا ہایہ زاگہ، اکھ اوہ
یوان بیا کھ یورگہ ہان، مگر عزی چا نکھ اُس نہ گنہ۔ ہا رتھ آہ تم واپس۔

وون اُسی معاملس داہ دوہ گوتی۔ تھانس نہر کنہ اوس یو ڈا حاطہ پتھ تھانہ نشہ
جرہ پہ و ہ مرد و اُرک کس کونس مزا کھ تناور وونی اُس۔ اپا رکر دزاوجیا لال اکہ دوہ
دوہلہ بتہ کھبتھ چکرا کر نہ تہ خراماں خراماں دوان ووت بونہ نش۔ اتہ و چھن نفر
کلہ نلہ ژا در ہتھ مس بندر۔ تمس اوس یہ بز و نہہ تہ اتین کرہ لہ شو نگتھ نظر گو مت
مگر گپن رچھن وول یا آہہ ر اچھ ز ا تھ اُس نہ اتھ کانہہ اہمیت دژہو۔ امہ و ز
گوس نکھ پہن تہ پتھ پٹھ ٹلنس ورن ز یہ کس چھ تہمیس ہفتہ ز ہفتہ گہ اتھ
شو نگتھ آسان۔ تم کھپہ و وٹھ پیلہ اتھ تل عمہ شو نگتھ و چھن۔ زن یہ عمہ اوس نہ
بھگوار اوس۔ تس آونہ یقینہ بہ کیاہ چھس و چھان۔ تھو دتھ کرس زرتھہ تہ پکہ
نوون تھانس کن۔

”ناوژ اوسکھ سانہ ڈیڈ تل چرس زالن اسہ نہ خیرے، تم و وٹس پکان
پکان۔ اُس اُس گری کنی وونی دون۔ ژ ہادا کھ گزئہ۔ ازور نے فکری بیم ساری
چھ ژنہ نش و نہ چوچہ۔ یہ تہ گوس از بالغ۔“

نسا نے کیاہ کورے ژنہ۔ تھو کمت اوسس لو ب کن بہتھ مس
کڈن، تم و وٹس۔

’وہ لو ووہی کڈتے مس تھانس منز۔ تھانہ کمہ خاطر چھ امی خاطر..... تے
چھے تھاندار صاب ڈھانڈن۔‘

’سائے کیاہ تھاندار صابس ستر۔ آئیل مجھے مار۔ مے تہ ون کھاپہ کتھ
پٹھ رٹ تھس ہٹہ مٹہ۔‘

’تانی کھکھ تھانگ بتہ۔‘
’گناہ پتہ۔‘

تھانس پٹھ و اتھ نیو جیالان سہ سیو دے تھاندارس نشہ سہ و چھتھ
ووزلیو و تھاندار صاب، سوڑے رتھ کھوئس اچھن منز، ناراناگو۔ بہہ ہندک
پاٹھی ہیوئن گرزون۔ ناوڑ پھو رکھانے، تے کتہ اتھ تم ستھ کلہ۔ ونہ ستر
آس نہ تسلا، گرسی پٹھ و تھ تھو دپنہ ڈچھنہ اتھ تراؤنس در تھاپر ز پانٹھ،
یو تانی اتھ ووزلیوس۔ اتھ یون و اتھ لو دن پتلون چندس شہلا ونہ خاطر تہ پلسہ
والبن گن پھپر تھ وون تمن، یہ بریون حوالاٹھ، ز ترے ریماٹھ سپد نس یو تانی
یہ مازوسبس۔ (پانس ستر تھ تھد) اُمس تر فکری کس ستر گیم گینڈ۔ مے چھے خبر
یہ چھہ کٹہ ژو رگر یہ دزاوشگردن۔‘

عمن ڈھن کلہ یون گن۔ اُک کر جوان پلسہ و اُک کر س تر تھہہ بنا کھ رو دس
ڈچھنہ کنی استاد را چھ۔ تھہہ کرن و اُک پلسہ و اُک وونس:

’یکو پکن کیا ز چھکھ نہ سرکاری بنگ آسہ ہی مال پیومت از گووے تو بہ
قبول۔ تمو نیو تہ یو رکھ اُکس کمرس، نیپری کنی کورہس ششپر وں دروازس

قُلف -

کمرس اُس نیم اندہ گٹھ۔ اتھ اندہ گٹھس منز آو عمس مہہ کاک زن تہ لہہ منز
 نیرتھ اتھس کبتھ نئے پتھ تھئے کز آے کران پتھ کز تمہہ دوہ اوں۔ سہ رو دس از
 تہ پہرس مدے گنڈتھ و چھان تکیا ز تہ سدس پتھس پٹھہ اگر تز کجار اوں مگر تھہ منز
 اُس سونرمی تہ یوسہ کز پتھن ز پتھن منز و چھہ اُس۔ تھاپیرن ہنڈ ز زوں تہ گوس
 کنن تہ دل او سس ونان وردن بیتز ہہہ نہ ذمہ، یو دوی کز اُمی راپہ اوں
 نمٹ ز یمن لگہ تینہ ون بہ چھس نہ کٹہ ژور۔ ذمہ ہنہ تہ نہ ہنہ کس تہ ڈبڈ بس
 منز آو پہرس وونی پانپے ستر ہر ونہ مگر چھیکرس اُسس عقلم ونان ذمہ ہون گو
 رت -



رتلوکول

بچھ وُن

وَنڈِ کال اوس تہ ہر اُس زیا دے پہن تیز پچھو۔ ڈریر تام لیفہ تل روزس
اوس مڑ یوان۔ مگر تھئے نیک نیک گاش ہنؤشن یُن، سانس کو پچس منز گپہ
اُکس بچھ وُن سُنڈ صد ا ”دیہ سُنڈی ناو دی تو کیشوہا“۔ بہ گوس ہشار تہ سوچم:
”اما یوتاہ سلہ کس نیر اُمس خارات ہتھ؟“ ہنگتہ منگہ آم بہ تہ خیال ”خبر یہ ما
چھ پلسک یا آرمی ہنڈ کاٹھہ نفر، یُس اور یور نظراہ دتھ، تمن تام شچھ خبر چھ
واتاوان۔ مگر تمن کیا چھ مائج ر ا دہو زیوتاہ سلہ نیرن۔“ شک کاسنہ موجب
مور اوم د ا رتہ دژم نہر کن نظر، مگر گاش کم آسنہ کنی ہنؤک نہ مے سہ پور پاتھر
وچھتھ۔ اُمی وِز دزلیہ میاؤی موج تو ملہ کو لہ ہتھ گپس کن۔ میہ سوئج: ”اُمس
چھ صحت ناساز، چھاؤ تہ چھس نہ ٹھپک روزان۔ یہ کتھ دزلیہ اُمس یوتاہ سلہ
خارات ہتھ۔“ صُجے پوہ ہر منز اُمی سُنڈ نیرن گوم ہنا مُشکل تہ کھوم اُمس بچھ
وُن سزخ شرارت۔ بہر حال ماجہ دس خارات تہ بچھ وُن وُئس: ”دے گرن
تہنر ر ا چھ راوٹھ“۔ امہ پتہ دزاو سہ ذوجس گپس کن تہ دُن پُن صد ا ”دیہ
سُنڈی ناو دی تو کیشوہا“۔

مے سوچ ”آئی چھ پوناہ گا مو تہ روشن لال چھ مولہ آلوہ۔ سہ کتہ
 نیرہ ستر مزہ نبر تہ دیہ اُمس خارات۔“ مگر تھے گیہ روشن لالہ بڑا ندیج لایٹ
 آن تہ امہ کنہ ہیک مے یہ پیچھ وُن وونی صاف پاٹھی وچھتھ۔ تس اُسی گہری
 پکول اگتھ، واٹکو دار زہٹھی مس لٹھری، ٹیس آس مالہ نالی، کھو وری بھیکہ اکھ
 جولہ اوند تہ وچھنس اتھس منز اکھ لور۔ قد ڈھوٹ آسنہ کنہ ڈولم شک زیہ
 آسہ نہ پلسہ یا آرمی ہند نفر۔ تانی مور و روشن لالن گیٹ، پیچھ و نس کُرن ہیر
 یون نظرا تہ دو پنس: ”نر زنگہ چھے ٹھپک، اچھ کوٹھ تہ چھے ٹھپک، ڈکینا زیہ
 کانہہ کا ماہ کارا کران؟ ژنہ ہوس خارات دین چھنہ کانہہ ثواب۔“ بیو اُری
 کر تھ تراؤ نس شزار تہ ہوت تاملہ کولی جولنس منز تہ تھے گیٹ پیہ ہے بند
 کُرن پیچھ ونی پڑھنس: ”ماتا جی کتہ چھ؟“

”کینا زیہ سو کیناہ کری؟ خارات میولے، گڑھ نیر۔“

”تکو و نیام سو دیہ مینہ اکھ کمل۔“

”پیہ تہ چھنہ کانہہ کمل وٹل۔ گڑھ نیر۔ اُسی چھ بیوقوف ہم توہہ ہوسن

لوکن خارات تھنا پکار چھ بناوان۔“

”دے کُرنی ٹھنڈرا چھرا وٹھ“ پیچھ ونی کُرس اُہی تہ دزاو۔

مے سوچ یہ بچار آسہ بانگہ نیران تہ ژانگہ پنن گر اژان۔ یاتام نہ

اُمس کانہہ مجبوری آسہ، تو تام کینا ز کر صچھے پگہے کانہہ ہنز بیو اُری رداش۔

پیٹس کالس دا روٹھ آسنہ کنہ کچم دند ٹکرتہ پھٹم تر کٹڈی۔ دا ر کُرم بند

تہ سوچم دون منٹن تر مٹر گو وئے یہ حال تہ امہ حسابہ آسہ یہ بچار شٹھو مت۔
 مے مورا و المارڈ تہ کڈم اکھ کمل، یوسہ وئے نوے اُس تہ اوسن کئے کئے
 ساتھ دولہ زنگن پٹھ ہوان۔ کمر مژ نیر تھ وؤم ماجہ: ”بتھے یہ بچھ وُن صحن پیہ
 پیہ، اُس دپ میناہ طرفہ یہ کمل۔“ میون پتے یوت وُن ز میانی مارڈ ترا وئے
 گن دولہ نظر تہ وؤنم: ”از کیا ہا ساد لیل چھے؟ ڈکٹھ پٹھ گوکھ اُس بچھ وُنس
 یوت مہر بان؟ سوہن بیتر ماؤ جھتھ؟ یہ کمل چھے نو تہ پیہ چھے رٹا۔ امہ کھوتہ بہتر
 گوڈو کانہ پٹھ ملٹری کمل اتو تہ اُس دنی۔ وُگیس نو، وُشیر گروہس وُشیر۔“

”ڈھنڑ ہوئس مہراہ بلاے۔“ مے وؤنکھ۔ ”تپتس کالس یہ نو ائے، خبر
 تپتس کالس ما آسہ یہ بچار موکلیو مت۔ تر چھ کوٹھو۔ دون منٹن تھا وئے دأر
 یلہ، یہ گنیوس لگتھ۔“

”یہ کمل اُنی مے پُرس دلہ۔ مے دؤپ تے چھے تر لگان، اتی ولہ
 ہن۔ نھے وڑ مے ڈیے، از چھ انصاف ولہ یوان۔“

”مے تہ مہراہ آو اُس بچار پٹھ انصاف تہ منس مژ وؤتھم خیال ز
 یہ کمل دیمہ اُس۔ لہذا ڈھنڑ ہوئس بلاے، یہ ائے نو۔“

”وونی کیاہ وئے زیہ چھے پائسن یوان۔ یہ چھے نہ کلبن کھسان۔“

”اچھا کر وونی ژھو یہ۔ یہ ولہ نہ کمل، بس گپہ وانوش۔“

مالس کھوت سخ شرارت تہ سہ ماونہ ہے پیہ کیشہ مگر تمہ بڑوٹھے

وُن ماجہ: ”گر سا وونی ژھو یہ، پر ان ہے چھکھ اخبار تہ پر، یہ بچار کتھ پٹھ

رُوٹھن صُجے پگپے۔ اُمس گوزر زرتہ دزنس پنہ نو پھیکو پٹھ تکتھ۔ خاراتس چھ
بجر! اُمس سوز دے بیا کھ۔“

”آ..... دے چھ کملہ وونان۔“ تکر وؤس جتھ چو ٹکھر اوتھ۔

یہ دھونکے دونکھ ماز بیٹھ ہے، مگر تئی ویزا اور روشن لال سون تہ پوٹھ
میانس مائلس متڑ پیچھ وئی سندا انزراونہ۔

”وچھو مہراہ، اکھ گو پچھن پیہ ہستی تیس کھستھ، پزانی کمل او سم منگان۔
ہتا دین ہے جھی ز اتھ دئی متڑ کانہہ کا ما کارا کرنہ خاطر نہ ز پچھنہ باپتھ۔ کمل
کیاہ گئے، اتھ مل۔ مگر تھ کئی کھسن بیم کلس۔ از منجھ کمل پگاہ منکن پیہ کیئہہ۔“

مے آویات یوت تام ز اُمس روشن لالس ونہ ہا کیئہہ مگر صُجے پگپے
گس کر ہے تیس متڑ بحث، سہ تہ مائلس تھی، یس گوڈے کو کئی نار اوس
تزاوان۔ بہ ژاس پنہ نس کمرس منز، پلو بدل او بم تہ دزاس کالج۔

دویمہ دودھ صُجے گو گٹیس تل پیہ سے صدا ”دیہ ہندو ناؤ دی تو
کیٹھوہا۔“ ہستہ منز دزاس نمبر، دارمو رتھ دژم نظر اما موج دیا پیچھ وئس کمل
کرنہ خانہ دار ہستہ و تہ روشن لال نوڈ لیلو متڑ بدلوس من۔ مگر صدا یوتھ دزلیہ سو
نمبر، گیٹ مورن، گوڈ دیوتس خارات موٹھاہ، پتہ وا جن پھیکہ پٹھ کمل تہ
وؤتس: ”گروہ کر عاش، میانس پچوس آوڑتے پٹھ عارتہ دژتے یہ کمل
ژہیے۔“

”دے کرن تہسزرا چھراوٹھ تہ رمہ ریشن آے اُسونس!“ پیچھ وئی

گرا ہی!

یہ بیلبہ پینہ گمر منبر دزاس مے وچھ مول اخبار پران۔ مے وون نہ
تس کنھی، البتہ اہم خوشی، زن تہ مے کاٹھہ قلعہ اوس پزوومت۔ چائے دتھ
وون ماجہ: ”کمل رتھ گوسہ پنچھ وون سبٹھاہ خوش تہ کو پنچھنے ژے خاطر رتے
رت۔“ یہ بوزتھ گپہ مینا کی خوشی دو گنہ۔

دو بیبہ دوہ تہ گوس سلی ہشیار۔ تر اُس بیبہ ہناتیز پمو مگر اندر کنز اوسم
پنچھ وونی سند خیال یوان زگر آسہ ازوشنیراہ کورمت۔ ژیر تانی رُدس دار کنز
مدے گنڈتھ، مگر آزونہ سہ۔ شے بجے یہ، یوتانی زستھ تہ ہبون بجنہ، مگر سہ گو
نہ گنہ تہ بؤد۔ یہ گوس پریشان ز اُمس پنچھ وُئس کیاہ گو؟ اما امی ماتر وویتھ
محلَس پنچھن۔ مینہ ژاپہ فکر ہش تہ منس منز و تھم اُمس مُتلق واراہ خیال۔
بہر حال بی سوچان دزاس پینہ گمر منبر تہ و تھم مول اوس حسب دستور اخبار
پران۔ مے وچھتھ وونگھ: ”وچھ ساچانہ کملہ کیاہ گل مھلرا وک۔“

یہ بوزتھ سو تھم ”شاید ما کھو تم ثواب اُس“ تہ وونمکھ ”کیاہ مہراہ، تو جو
چھو او نہ تہ تھ کملہ مُتلق سوچان۔ سو تھکی سندس قسمنس اُس، تس و اُژ۔“
”نہ اُس سوچا اُس قسمنس تہ نہ تہ سندس، تہمس ژے وژتھ۔“
”خبر کیا ز؟“

”اخبارس منز چھ پلسہ محکم پنچھ وونی سند نوٹوچانہ کملہ سان دیشمت۔“
یہ بوزتھ گونے سخ افسوس تہ وونمکھ: ”تلہ مہراہ یورک دیو یہ اخبار۔“

مے رٹ اخبار تہ و چھم غور سان فوٹو۔ مے ہیوک نہ فوٹو تلیہ سہ پچھ
 وُن پز زناوتھ، مگر پنڈی کمل پز زناؤم ضرور۔ ماجہ کرمی سہنر ہناخت تہ گوس سخ
 افسوس۔ فوٹو ہس تلیہ گنہ اُس اکھ عبارت لیکھتھ، بیتھ منز اکھ اطلاع عام اوس:
 ’اکھ لاش چھ بس سٹینڈس نکھ میچ مہ۔ ہر گاہ کاٹھہ تہ نفر اُمس پز زناو، سہ ہیکہ
 میڈیکل کالج یہ لاش نتھ۔ بیتہ کرو اسی اعلان زیہ لاش چھ لاو اُرت۔‘



فیاض تلگامی

نعت

چُھ ہاؤن کیئت نہ کتھ حرفس محمدؐ
چُھ ہاؤن کیئت نہ کتھ طرفس محمدؐ

شرف تکر سُنڈ چُھ حاصل کُل جہانس
شرف باساں چُھ پڑتھ شرفس محمدؐ

عرش باواں تیئیس اسرارِ آسن
سہ آسن ہتھ گہاں فرشس محمدؐ

قداور ہے قدم یوسی کراں چھس
سرس قد کئی چُھ پڑتھ سروس محمدؐ

ہواوس خوش پوئی خوشبو مدتیج
چُھ مُشکاواں نہ کتھ چمنس محمدؐ

چُھ ہاواں کس نہ تکر سبزو دِڑے چُھ شوون
تھواں پارتھ نہ کس چگرس محمدؐ

پرن چشمو دِس خوشون چُھ باساں
چُھ ناپاں کتھ نہ روپہ ورس محمدؐ

سہ ختم المرسلینؐ، فخرِ دو عالم
وصف پائے چُھ پرتھ وفس محمدؐ

برس کن تس ہلم دا رتھ چُھ عالم
تھواں نادن نہ کن پیتر کس محمدؐ

لفظ کوتاہ جرن اتھ نام پاکس
چُھ ٹاٹھبن مثر نہ کتھ لفظس محمدؐ

یواں زیو پٹھ چہ بیلہ عرضی فیاض
نپاں کاکد، وزاں قلمس محمدؐ

رشید صدیقی

نعت

مدینس گرہو نازنہنس وُو حال
 سُو کاشرو شاہ دہنس وُو حال
 سُو دردل پتہن غریب لاچارن
 برس تل تمس ماہ جہینس وُو حال
 غمو تے دوکو ستر اُمت گہر گاؤ
 رُو پائے نازتس مکینس وُو حال
 چھ امنگ خلوصک رچک سہ پیکر
 کرو زار پار تہ حسینس وُو حال
 چھے ناو گرد آبس پہ باووتس آغس
 پتھر تزاو سر نازنہنس وُو حال
 چھ غم، دوکھ تہ افلاس کاشرہن صدیقی
 کرو کوٹ برداش امہنس وُو حال



نعت

ساری چھ پران لولہ سائے نعتِ مقدّس
 شاعر کراں اتھ مثر بیاں حالاتِ مقدّس
 یہ چھ نوری محمد ز یس تخلیق گوو اوئے
 اتھ نوری پاکس اسی چھ ونان ذاتِ مقدّس
 یم اُخری نبی تہ عطا گوو یمین قرآن
 یمینے پٹھن نازل سپدی آیاتِ مقدّس
 عاشق پراں دروڈ سوزان ڈالہ گنہ سلام
 تمنے گربن ساری وناں اوقاتِ مقدّس
 ذکرِ نبی یس کر تمس شینہلاں چھ دل بے شک
 کاٹھہ ساعت اُسن، تھ چھ بنان ساعتِ مقدّس
 ہچھ ناوری آنخزورویے قائیم کرنی نماز
 مینا گنہن کتھ گنہ گنہ عرفاتِ مقدّس

انصار و مہاجر کراں تعریف حضورؐ
 امہ پتہ کراں تم یاد مواخاتِ مقدّس
 آباد گری متڑ پانہ حضورؐ چھ کھڑو باغ
 از تازی چھ مویود تم باغاتِ مقدّس
 اکھ زمزے مکہ تہ پیہ تمرینِ مدینہ
 امہ کھوتہ چھما بہتر کھنٹے سوغاتِ مقدّس
 غمگین اوئس واریاہ گئے مے ساری دؤر
 ملکو مدینکو ییلہ مے وچھ طرفاتِ مقدّس



عبدالرحمان برٹ سکندر

نعت

خدا چُھے مدحِ خواں نبیؐ تاجدارس
گواہِ اتمہ چُھہ فرقانِ نبیؐ تاجدارس

یہ قوتوںِ قدرت چُھہ کتبہ کُئی چلان
سچ پختہ پاری زانِ نبیؐ تاجدارس

وہی بڑوٹھہ تُمس کُئی وٹے حق تہِ ناحق
سچ ازلہ پہچانِ نبیؐ تاجدارس

درد مند تہِ دردل چُھہ تم کائناتس
سبٹھاہ ٹاٹھہر انسانِ نبیؐ تاجدارس

الف لام میم چُھہ کُئی رشتہ و تم
امیگ پڑھ تہِ انمانِ نبیؐ تاجدارس

صفاتِ کران گزند گرتھ گُس ہیگی تس
سوائے سہِ رحمن نبی تاجدارس

زِ عالم سراپا فدا آنحضورس
ملک، حور و غلمان نبی تاجدارس

عزت چھس کمالگ شرف چھس جمالگ
سبٹھاہ رڑتہ بڈ شان نبی تاجدارس

حکم چھے چلاوان خرابی مٹاوان
تحت چھس حکمران نبی تاجدارس

چھ موئے مقدس دوطرفے چھ سم تھہ
زِ گیسو اویزاں نبی تاجدارس

چھ عاشق فدا تس گمٹو روئے نازس
سکندر تہ پروان نبی تاجدارس

ظریف احمد ظریف

شا پھل بہار

بہار آو عالس، اسہ ما بہار آو
 چھ اند وند پوشہ ون اسہ زن ہر دژاو
 گمتو کلو جل تہ بلبل ہری گوان کاو
 چھ اند وند پوشہ ون اسہ زن ہر دژاو

سرن، ناگن، کولن، ڈورن تہ باغن
 مہتھ نیو یاونے بخ بستہ ماگن
 وٹس گئے خواب تعبیرے مسہ دژاو
 چھ اند وند پوشہ ون اسہ زن ہر دژاو

موج پدمانی پر وار اس مہرتی
 پرو پوتھ نیم لوتھ یہ ساوئی

امارن شاپھ لوگ شوقس دودر ژاو
چھ انڈ وند پوشہ ون اسہ زن ہر دژاو

گہوان اسی نغمہ لو لکو ہار تہ کستور
ویہس امرت بناؤن سون دستور
نٹلان دگ چھم چھوکن وٹنگ وہیل واو
چھ انڈ وند پوشہ ون اسہ زن ہر دژاو

شہیل وروار شہجار ہر د یوز گؤو
بہارس ڈوٹھ پیو وبتھ نون چمن گؤو
گولابس بامنے ددر کونڈ پھلتھ آو
چھ انڈ وند پوشہ ون اسہ زن ہر دژاو

لیندر، سبند، وبتھ پھیش وٹھ تریش ژھاران
گؤٹھیل لوگ بونہ پتہ پھرس وپر تھاران
نشاطگ سرو گل ککرس پپس ژاو
چھ انڈ وند پوشہ ون اسہ زن ہر دژاو

کوہن پٹھ شہین جنگریو شورِ و بگلو و
 دُہل دُجو لد گومت سہ تہ را ژنہ بگلو و
 چھ اوسمت اسہ تہ کرتامتھ ژتہس پاو
 چھ انڈ وند پوشہ و ن اسہ زن ہر دژاو

سو کھے مؤٹھ گامہ شہرن ہُے ژوپاری
 کمن آباد خان گے و جاری
 رُحس لمہ لم ژوس گاؤ زدل ناو
 چھ انڈ وند پوشہ و ن اسہ زن ہر دژاو

چن واران وولستھ آے دُدون
 شہن تامتھ شہری چھم ژھاپہ شانکن
 چھ پوترس نکھ دوان مولے یہ وق آو
 چھ انڈ وند پوشہ و ن اسہ زن ہر دژاو

اچھن پچھ پھیر کر تھ خوزری مہان چھم
 اوے چھو کہ لدے ہن ہن چھم نظر دم
 چھ زپتھ پردوے نیومت مے تھپہ داو
 چھ انڈ وند پوشہ و ن اسہ زن ہر دژاو

پرو پُشناو از تامتھ پرن مینائی
 وطندارن دؤپگھ وانگ لیکھو لائی
 چھ پیران وانسہ وادو پٹھ یہ سائی ناو
 چھ انڈ وند پوشہ ون اسہ زن ہر دژاو

یے بہرؤپی از پیہ ہوٹ رٹھ چھم
 یہ اوٹت سالہ یک پنہ ئے سہ اوٹم
 تھون للہ ون یہ شراسہ پانہ سکھریاو
 چھ انڈ وند پوشہ ون اسہ زن ہر دژاو

یہ سانو زور تہ سورمت قرنہ وادو
 زران تی اسی تہ از تامتھ پدادو
 دستم چھو کہ خونن تینگی خیر سے او
 چھ انڈ وند پوشہ ون اسہ زن ہر دژاو

دوان آلو چھ بلبل باغوانس
 مہتھ یاون ژلم ہتھ گلستانس
 زرد ہتھ چھم گوٹت سوٹس سہ سبراو
 چھ انڈ وند پوشہ ون اسہ زن ہر دژاو

بہارس ماگہ ژھٹھ لُج داغ پوِشن
 تَوے زردے گل بلبِل چھُ روشن
 گلن وارنیو ژلن دوکھ داؤدِ وق آو
 چھ ائدِ وند پوشہ وَن اسہ زن ہر دژاو

رندن ہندک پاتھک توگ کتہ زندِ روزن
 پہ کترس شزاکہ یمہ تنھک آیتن چھس
 پرو پر دب تھووم دتھ شاپھ پنہو
 یو ہے تقدیر زاتھ زندِ موؤس

کرن شادیانہ زندِ اظہارِ ماتم
 پہ چھا دستور دیانت شانِ آدم
 ووتھ سوے میر ہنز خوشیو پہ پیارن
 سیکو دن تریش وِر دنِ بالہ بادم



نگہت نسرین

نظم

ڈر آسکھ وُنہ بہتھ تھہ یونہ شہلیس
 کراں آسکھ ڈر بھیر تھر شرک خیال
 مھولاں وُنہ آسہ نئے ژئے تہ گل دہانس
 ژئے آسی وُنہ تہ ووتھرن پوشہ ارتھہ
 پدہن تل وُنہ تہ آسن ناگ نیران
 جو اُنی پٹھہ ژئے اُسی رشک سپدان
 ژئے آسہ نئے تاز وُنہ تم یاد ساریے
 وُٹھو پٹھہ وُنہ ہراں اُسی ژئے شبنم
 ژئے آسہ نئے وُنہ تہ رُژھر تھ خواب پوئو
 ڈر آسکھ فکرِ روس آزاد طائر
 ڈر آسکھ گتھ کراں وُنہ شاملارس
 ڈر آسکھ وُنہ تہ رُوژتھہ انتظارس

ڈاکھ نظر تھا اوتھ پوت ڈھان

ڈاکھ و نہ سناں تہ لولہ نیاں

ہے.....!

ہے آیس کر تر اوتھ میون مالین

ہے آیس کر تر اوتھ روپہ تالین

مے بیلیہ رخصت ڈر اتم باہہ جانن

تہ ہلمس منز مے تر اون ٹوڈی وائلتھ

دہپنا نم را چھ کر ز بس وارہ چھ زہن

گنڈتھ تھو نم صبر بیلیہ لونچہ منز کر

ہے بیلیہ پشرا و نس تم غار زانن

اویزاں تر اونس تھ اوم داوے

مے مشر اوے تمے ساتن سہ مشر کی

ڈھیل ڈھانجن گنڈن پیہ سز کترہن

وسن پیہ شام و اتھ یار بل گن

مے مشر ایووسہ روشن پیہ مناؤن

مے مشر ایووخیا لن پر لاء گن

مے مشر ایوونڈو دگ دود باوڈی

سیاہ چشمن سنایم نیز پیہ گنڈی

مے ہچھ ووڈی بُر دباری خانہ داری
 مے ہیو چھ لہہ وُن لولہ لکہ ہند سہ نلہ وٹھ
 کراں لولہ کھول پہ چھبس از پزانہ وارن
 اچھروا لُو دُواں چھبس لُوھ پہ ہر دج
 نموہ ستین پُجاواں چھبس پہ پنجر
 دُن چشمن اندر چھبس خواب تھاوان
 دِواں ژھبہ نئے پہ ماچھبس مال ریشٹج
 کتھوہ ستین پہ چھبس از نیاے اُتران
 سہ کونکل مس
 مے چھم زن شپن زوتان



اصل: پروفیسر سنجیوا داس گپتا
انگریزی پڑھنے پر ترجمہ: ڈاکٹر عابد احمد

آبِ حیات

دُریا و تالاب، جو یہ تہ سڑک لے لے نغمہ گوہر
 تپتے زن روڈ شرانہ رُمن رُمن پنیہ
 زندگی ہندی جادی پھیر گئی یلہ
 صدین ہنر ہو کھیہ پتہ
 روڈے روڈوں امہ دوہ
 یوت نہ امہ بروہہہ زانہہ پیومت اوس
 روڈ کولہ وژہ بالو پٹھ
 آبشار آہ ووسنس تہ
 لگی گوہر
 دُریا و آہ بریکہ
 آہ ملرو تھی
 تپتے گورن پنڈی اتھ ز دُری

آپ پھیرو باپتھ



دُنیا لوگ گتہ گیور کرنہ
تتھے زن کرنہ نہنہ تمہ ہنز کور ہنز اُچھ ووزلیپہ
سہ کنیاہ اوس یہ تمہ بوز؟

تمہ وون

”پہ جھس اُ کس چندال ہنز کور
میانہ کیر ٹیک آب چھ ناپاک
پہ کتھ ہیکے ژنے چہنہ وونی دتھ“



گورو و تھس.....

”یتھ کنی بہ اکھ انسان جھس
تتھے کنی جھکھ ژتہ

یہ آب چھ یا ترین ہند باپتھ

سہ آب یس تریشہ ہتہن

تریش ہو مرادان چھ

سہ آب یس ژھو کیمتہن تہ ہو کھو ہتہن

زندگی بخشان چھ

یہ چھٹی تھی۔ تھوڑا آب و نان چھ

مے و آبہ دامہ

دے پنہ کیر منز آہے رڑھاہ

☆

کرہنڈی دلت کورج نرنہ

اُمی سُنڈ کیورہ تھہ نہ کاٹہہ مازلے اوس

بنیو و اتھاہ سمندر

اُمی سُنڈ کیرچہ لہر آہے اُمی ہے کورہ ستر نران

پرڑھینڈی کورہ و ہراونر

تہ آسانہ وڑھ شفا بخش روڈراٹھاہ

یکو اُمی سُنڈ بن تریبہ ہتہن

رمن رمن شہلتھہ بخش

زندگی بخش آب حیات کو پاٹھر

گرن ہشیار مورہ زندگی نش

گرن آزاد بے جس صدین ہند

تہ غلیظہ ظالم خیال ہند کندی زالہ نشہ

☆

گرو تام قطر یم گورہ سبز دوڑھ منز پیہ

اُس کڑیہنہ دلت کورِ باپتھ نو ورنم
 تیس کورِ باپتھ یوسہ
 بدنام، پر تھنرتہ کم پایہ اُس
 ہمیشہ روزمہ

تہ
 چھیکرس چھوک
 ذات و نشہ آزاد چند کلبہ
 شیشتر ولباس
 ہواس منز



م، ح، ظفر

غزل

پڑتھ آس گج چھ توتہ تسند انتظار ہیو
 باساں دلگ سیکھیل چھ یوہے آبدار ہیو

آساں اُتی چھ شوڑ، اُتی داغدار ہیو
 کم بزم دواں چھ ذات کھٹان بازرگار ہیو

لاحد تہ لامکاں یہ موکل گاش منتشر
 کتھ پٹھ چھ دیش کال یوہے بے قرار ہیو

دپہس ملالہ تراو سہ کر مانہ میناڈی کتھ
 پڑتھ ہس پٹن خطا تہ گڑھس ناگوار ہیو

منسأ و بود تہ پڑوٹ اہنکار کینہہ نہ مؤثر
 اُنینہ در اُنینہ و چھم اشتہار ہیو

کموکھ تمام جس تہ کرکھ میل شوس شنس
 ژینکھ پنن وجود یوہے آبشار ہیو

یتھ دُونس چھ آب و ہوا تاحیات بند
 پیتر شاہ ہنس ظفر چھ مسا واگذار ہیو



عبدالعزیز بیٹاب

غزل

خیالِ لوگ وُتّش، سُوے خواب شاید
مے مائری پٹھری گوٹت سہلاب شاید

دوہے آسان چھے، چھوٹھو حُسنس تہ لولس
چوٹت لولن دپان مٹر آب شاید

دیوارس پیہ تہ گے ووتلّھ سو تصویری
وُلتھ نہ نہ کراں ککھاب شاید

غزل اُسا، نظم، مرثی، رباعی
ولس کیناہ پوٹھ نبرل نایاب شاید

اچھر ووتلیاے اُنڈر اُنڈر گبر کورہم
امارن دیت اُنڈر مضراب شاید

یہ کوسہ تامتھ پُری ژامو پزے کو چھم
شعر باوڑی یچے اسباب شاید

یہ فلسفہ کور دن ڈھیل زمان
چھ ورتاوڑی وونڑی آداب شاید

خیالو کور وڈو آکاش ہیر کز
چھ پزانے تڑاپہ وُنہ بیتاب شاید



اشوک کماردر (گوہر)

غزل

پزی زوئے پتیس زوالس دیتُم
 روا پینہ ہوا تیتھر خیالس دیتُم

حقیقت چھنے لوکن مُضر طپیس
 پھوڑم پوز جوبا سوالس دیتُم

وچھم پاک راتکو ملتھ خاک از
 وچھم شزاکھ زن چاک نالس دیتُم

برس تا گرس سون بژن چھا بجر
 وچھن پز ازر کیا عیالس دیتُم

خبر چھم زمانس چھ سوئے اثر
 دس منز پئے زانہہ ملاس دیتُم

وَنے کنیاء وُمرِ کتھ لَینِ مَنزِ کدُم
خَطَا بے شہنشاہ کنگالَس دیتُم

مے چھنہِ غمِ خَطَا دتھ دغا دتھ سہ گوو
فِرِض اوس رتہ سگ گُلالَس دیتُم

دو کھن مَنزِ مے یوزم سو کھن ہنڈ بسر
رہ چھتھ ستھ یہ وچھ پرتھ سوالَس دیتُم

سومبرتھ زدن نیو سو کھے گوہرَس
ہیو تُم ہن تہ تن من شوالَس دیتُم



اے، کے، ناز

غزل

اُنہ پہتران عذاب وُچھو
 ناو در گردِ آب وُچھو
 یاد کئی تھو و راتگ دوہ
 پزرن ہیوت مہتاب وُچھو
 واران سبزار دُر گلزار
 سیکہ شاطن شاداب وُچھو
 پزرس چھا سا گنہ پرخاش
 نیایے گوتم نایاب وُچھو
 کھدرے کھوتمت وُچھو مول
 لڑھ گوتم کمناب وُچھو
 رت ما نازس درنٹھے آو
 وُزبس رت کانہہ خواب وُچھو



نادرا حسن

غزل

موتِ بڑگوٹ چھکھ کمن پتھ تم چھ مستانے بدل
کوٹ دواں دا رتھ ہلم چھکھ تم چھ استانے بدل

چھکھ کران گتھ کس لمان اتھ لوچھ پی گوواشتراک
تھھ کرئی وا جب یمن چھے تم چھ دامانے بدل

پر پنن پرکھانے بکو چھکھ دواں دعوت کمن
بر وٹھی پردین ثنے تھاتھ تم چھ مہمانے بدل

سچد کر کنگال تاں وٹھو عشقہ مادانس اندر
نجدون چھانٹھ بیو کوڈ تم چھ دیوانے بدل

آمہ اکہ پن داوستن چھکھ دواں ہستس بڑ ڈنگ
عے ٹیل گری رام بیہمہ ستر تم چھ زولانے بدل

بکھوس ناداں میناں خام گزِ مِترِ آسمان
 نل کراں یم کائناتس تم چھ میزائے بدل

نئے تڑ بدلیو کھ وعظ بؤ زتھ نئے گوؤے بیدار شل
 دل چھ نیمہ مِترِ زبِ سپداں تم چھ افسانے بدل

قولہ رِسِ تِس نِش نہ پاتھن ہولہ روس کینہہ ناؤرا
 لولہ کئے پیتر مالہ آساں تم چھ ٹھپکانے بدل



غزل

ہمدرد کاٹھہ آسہ ہے شہرس اندر
ما وچھن پیہ ہے مٹس بایا سفر

راتہ موغلن ہنز یہ بستی خوفناک
کریٹھ وارا دوہ کڈن پیہ چھے بسر

سیکھ صحراؤں اندر چھس تشنہ لب
سایہ پننہ چھم دواں پانس تور

دوونس اندر یہ رووس شام گو
بس بدن شہلاو وونی سچ نظر

سرخ گوشت آسمانس رنگِ ژوپاری
رقصِ ظالمِ خونہ سُری گو بحر و بر

پان مارن بوچھ ٹنٹس پو سڑک پٹھ
چھگھ ژمس چتھ مس گوٹ محلس اندر

پشم بادامن اندر بیمِ خوابِ دُدر
مائو نم بہتھ گئے دنِ قبرن اندر

مینہ شہرک محل گو لوگ تباہ
نفرتس از سگ دواں ہر کاتھہ بشر

ہاشما وونی اعتمادک ژونگ ژھیو
گٹہ زلس مضبوط گئے دیوار و در



ISSN 2278-3245

BI- MONTHLY KASHMIRI JOURNAL

SHEERAZA

Vol: 56, No: 3
May - June, 2023

Editor

Jawaid Iqbal

Assistant Editor

Dr. Gulzar Ahmad Rather

Research Assistant

Maqbool Sajid



**Jammu & Kashmir Academy of Art,
Culture and Languages, Srinagar**